





雙溪王先生文集叙



叙曰予聞之孔子云不知其人視其友孟子云
視速臣以其王先生所與友所與王者何人哉
文公居虹井先生居武口相望一舍而近文公
還自閩一見志合升堂拜其親又同往東山九
曲亭講易他人於文公師之而先生友之南軒
帥江陵先生為簿以劉文敷薦辟至幕府議論
亶亶相得他人於南軒馭之而先生賓之夫以

文公南軒相信如此其於為文公南軒之學者
宜何如也吾又愛其和糴書惓惓乎備荒則似
法文公之義倉湖州劄子雜容乎揀邊則若助
魏國之恢復宋雖未造有此三賢非三仁乎是
故用文公於經幄南軒於機制先生於著作匪
曰不遇矣其不致太平者則南渡之運不足以
亨賢非南渡之賢不足以拯運也幸其書在焉
雖不於其身亨之天下亦將亨之不於其身拯

之天下亦將拯之今天下讀文公南軒之書者
數數然矣而未見先生之書此非其亂之責而
何予從友人懋守懋元得此集誦之數月則見
其文探於性命而不為章句其政流於忠愛而
不見利祿其氣則行之以至大至剛而不怵形
勢至論明堂郊祀禘祫宗子周禮卦爻諸篇猶
可以見先生之學卓然識其大者使其生於今
與我

聖王明德復古則后夔之任足以當之矣豈適
為端甫小相哉于是僭加訂正叙而歸之懋元
与其群從守信惟信瑩琰璵五人刻之

嘉靖十二年癸巳冬十月吉後學同邑潘滋撰

重刻雙溪文集



擔夫劔器草聖以之神妙顏垣敗壁畫者發其
天趣物不有所悟不能精也况文章五行之秀
寓之風騷又秀而逸者也非胸中有書則筆下
無眼雙溪居士風流蘊藉萬卷在手融為春風
散為雨露茫茫如河漢鏗鏗若金石其纖襪簡
遠則竒葩異卉清波素雲其悽愴慷慨則古臺
廢殿泉弦急管態度橫出字無一塵意其左圖

右史劃然中機振 命筆瀕洞流轉与含毫對
簡出吻悲鳴者不可同日語也雖然文人才士
肺腑蕪天地之祕犯造物所忌故多窮李太白
杜子美諸公鏘鳴韶濩突兀穹壤間徃徃憂傷
悲悴流落困躓君子三嘆有餘象今居士入遊
省寺出駕五馬不為不貴而搜神奇變化人鬼
間獨飲涕茹藿如老禪衲又不知富貴為何事
豈所謂窮中之達達中之窮者歟昭先昔官雲
川時誦公詩文灑灑乎如清風濯體恣命叙引
誼弗可辭勉述數語以致高山仰止之意云

後韻

雙溪文集目錄

卷之一

古賦

竹賦

夏日郊行賦

中隱賦

霖霖賦

水西風光賦

雉賦

喜雨賦

釣臺賦

石菖蒲賦

古辭

鳴水洞辭

懷忠堂辭



古頌

太廟瑞芝頌

卷之二

五言古風

飲馬長城窟

門有車馬客

出塞曲

遠離別

薄薄酒

夏日過雨

村行

雪晴即事

呂待制所居八詠

半隱

歲寒

遊硯山

春日書懷二首

答韓毅伯五首

漁人

送游堯臣歸閩中六首

送張飾之

題陳叔適軒

梅花

秋懷五首

又五首

以遊子悲
故鄉為韻

用前韻答黃一翁五首

平江道中

公檄如蒲圻訊民之食菜事魔者作詩憫之

題咸寧江宰德先清遠堂

生朝無以自慰作留貧薦一盃

用前韻答黃一翁二首

賀林監生日

和趙行之三首

秋旱得雨

到城南瞻南軒先生遺像

用前韻答彪講書 送李侍郎歸衡州二首

和謝安國求硯 和謝安國韻

送謝安國歸清江 冬日書懷四首

賀東宮誕辰 代林寶文 賀林寶文生日

和王右司回鴈峯韻

送王右司移江西憲

韻胡元龍携詩相訪

題巴陵宰鄧器先北窓

陸簿生日

新晴出谿上因訪王伯明詹望之

用元韻答詹望之

寓分寧去故鄉久不歸者三年思松楸成長句

遊南山寺題澹軒 用元韻答麟去

再用元韻答麟老 和祝聖予送行韻

謝黃子山賀得孫 謝江潭諸公

題董壽卿博雅堂 題童壽卿秋山圖

送許士龍秘校 題韋同年聚遠閣

送施宣教

壬子春羅長贈別

題蒼玉軒

清江勸駕送舉人二首

次韻分寧羅簿贈行二首

郊祀慶成詩

和李提幹携詩相訪

用前韻答李提幹

送朱大卿歸龍舒

題徐商叟所藏李伯時四天王圖

送陳華文出守當塗同僚餞別分韻得立字

念往四首

通守趙侯

倅會稽以詩餞行

勸農道

山

苦脾泄在告因飲白酒一盃小愈魏倅有詩已

而病復作因次其韻見意

生日魏倅惠三首

送魏倅

舟行過白石見將使夜宿毛家林翌日到莘莪

却回和清老

病中即事

丙子重陽日有感

初春苦寒摧折到雙溪成長句書懷

病起

拒霜飛

脚婆

李忠甫見惠長牋以詩謝之

追念將使叔

和汪誠之韻

咏便坐梅花

病中即事二首

卷之三

七言古風

明妃曲

公無渡河

雉朝飛

關山月

白頭吟

粧樓怨

舒嘯

呂待制所居八咏

月臺

餘韻見各卷下

太平遇流民

雪中懷韓毅伯

犬捕鼠

春日

促織

大水行

麥苗已有生意掘烏禰者未止

雨晴出田間

鳥羨

聞虎傷人

題周功甫總領石溪三亭

溪亭

雪亭

嫣然亭

黃一翁自郡城回

過幕阜

喜雨歌

留獻之初得孫

宿公安二聖寺

賀吳繼仲母生日

題王倅來泉

題巢林

過浯溪讀中興碑

吊禰正平

次韻韓毅伯謝人惠茶

次韻韓毅伯趣諸先輩送茶
再用前韻因簡縣庠諸先輩

次韻韓毅伯誌別 覓李尉白犬

送徐尉移簿巴陵并簡卸器先汪兼善

用元韻答徐尉 用元韻寄周推蕭法

用元韻答汪廣文

用元韻答鄧宰兼簡華容孟宰

用元韻答徐尉 和許尉小洞庭韻

再用元韻 喜晴行呈陳宰

和何應辰過山谷墓韻

次韻孫居易送行 陳宰生日

題童壽卿遠山平林圖

題徐秘校達軒 冬雪行

次韻答簡簿 和王文州梅花韻

題清江常宰道院 題徐參議赤壁圖

題徐參議所藏唐人浴兒圖

和潘判官送酒韻 除日江上迓趙憲

題德夫園亭八詠 右梅隱

右橘渚 次分寧胡宰贈行

次韻吳司令知金州

慶元丁巳九日登叔寶塔同遊者楊大著李校書馮正字曾著作易校書

用元韻答楊大著李校書

送黃尚書帥蜀

臘中得雪快晴成古風呈堯章銘老

用元韻答李郎中 喜雨

用元韻答秀叔二首

秀叔和章自言及再娶之事因韻戲答之

送石宰

紙被行

汪直卿相招子大先生有詩炎後至子大再至

因次其韻

穀雨後一日子大再至有詩次其韻

鱸溪行

挽魏倅項教授小飲

用前韻酬魏倅

夜聞雨再用前韻

魏倅同杜仲高游黃龍洞次韻

賀監宅

春日苦雨

夜宿閔灘下

清老畫雙壁以詩謝之

用元韻答清老

再答清老

再用前韻

與趙道人

卷之四

五言絕句

擬古閨怨三首

自南齋晚歸二絕

次韻朱晦翁十梅

用十梅韻答馮簿

勝賞亭

贈郭相士

題王解元壽萱堂二首

陳推官幽居十詠

彭蠡歸舟

山堂曠望

重湖泛月

星鸞晚釣

雨後觀瀑

松徑閑步

溪上賦詩

林下避暑

載酒尋梅

雪中訪隱

和馬宜州卜居七首

卜居

足堂

復齋

退圃

冰雪軒

欣欣亭

白蓮池

題彭城館畫屏

歲寒三友

題李道士揖雲軒

題熊道遐觀閣

題劉知宮愚圃三首

遊東山九詠

田舍

松風

爛柯

舒嘯

伴月

棧徑

入翠

盤石

披雲

卷之五

七言絕句

呂待制所居八詠之一藤洞

餘各卷下

山間偶成二絕

如大坂二絕

田間閑步

晚浴谿上

到田石先妣新墓

新晴二絕

溪上晚望二絕

古塔主語錄

田間麥秀因成絕句

到大坂

廡舍梅花欲開三絕

郊外見梅再用前韻

山郊雜詠七絕

聞杜鵑

至灌溪子懷老二首

宿野人家

聞蟬

山行二絕

春日二絕

到常清寺予哲師三絕

晚憇田家二絕

野鳧

喜晴

雨中山行

春日即事四首

雨後繼成二絕

陪留宰游灌溪田飲縣圃六首

和留宰賞茶藤二首

夜宿江上

贈李居士棄官為僧二首

夜坐偶追悼猪哥不覺流涕因以絕句寫其悲云

湘中雜詠十絕

遊岳麓三首

和林文寶雨

豐年謔五首

再和林寶文三絕

和林寶文吹暑軒二首

和蕭叅議遊岳麓八首

和王右司遊南嶽三首

和韓毅伯知命

和毅伯求鹿皮韻

居民多疫為散樂

聞田家插秧已畢

偶行後園成三絕

小鳧

蛙聲

出郊三絕

古仙洞

馬驛

勸農

出郭視田訟三絕

和吳秀才二絕

過涪翁墓二首

即事六絕

和麟老韻五絕

題童壽卿潮海門圖

題楊秀才園三亭

繡春

見山

移春

題徐叅議畫軸

和王宮教韻送酒

再和王宮教韻

送簡簿攝南康令三首

題乘槎

和壁間謝良齋留題

酬白雲張道士惠詩

題謝良齋畫筭四首

從范秘監過城東亦顏讀書樓二首

送術士胡果

楊秘監館中留題

同李魯二郎中遊三茅觀三首

用元韻答李郎中三首

用元韻答鈺老三首

出城

題姜堯章舊遊詩卷

和九日堯章送菊

池邊梅花一株盛開

戲江子大

用元韻答子大

念舊二絕

賀吳興郡王生日四絕

江子大有遊東山之約以詩相邀因次其韻

次韻江子大四絕

奏事入都出西上成四首

四聖觀

南園

淨慈

招諸宰飯六客堂以小詩代簡

題歸鴈亭

題愈子清侍郎惠畫二絕

送蓬菴梵老二首

梵老以小詩為壽次韻答之

呈游大治

麝香萱草

寄潘維節

鑑湖

病中書懷

將使叔送玉堂春花江南竹笋次韻二絕

題慶源詹氏佚老堂 落花

社日 喜晴二絕

將使叔有詩許移厨雙溪次其韻三絕

和將使叔早雪 雙溪種花二

春日有感 題汪尉立之快閣

和何元清韻九絕 舟行到洋莪和清老韻二絕

冬至日雪 次日快晴

早梅 子用惠魚四軸以詩謝之

七夕一絕

興三山相士林子和三絕

梅花二絕

卷之六

五言律詩

冬日即事

春興二首

旅興

蔬食

春雨

江夏道中遇雪

再如蒲圻二首

行湖路

晚春書懷簡陳巽叔二首

野次訪于從周不果因寄二首

過鳳隱山 過靈塔寺

過西崙莊一宿 湘陰道中

寓江陵能仁僧舍二首

夜坐 復州道中二首

書舍遣興二首 即事

清化寓居 除夕官舍獨坐

李閣學挽詩三首 魏丞相挽詩三首

黃致政挽詩二首 和黃先卿即事五首

送相士管明甫 溪上晚步二首

宋可挹挽詩 述懷三首

王倅成老挽詩二首

方漕躬明挽詩三首

送房陵倅韋同年二首

贈輪上座 寄蔣主簿并簡劉判官

用元韻答劉判官 用元韻答戴簿

用元韻答蔣簿 蕭叅政挽詩二首

題張夫園亭八詠 題謝良齋桂山

送謝廷玉二首 送劉都幹

送王選澤侍郎 張尚書挽詩二首

李少保挽詩二首 太皇太后挽二首

九日陪陽秘監遊真珠園屬炎賦詩
銘老許相過不至炎約堯章訪之又以事奪銘

寄二詩因次其韻二首

炎十世先隴在婺源不歸拜掃者九年矣遇清

明有感成詩

游水樂洞

即事四首

太上皇后挽詩二首

太上皇帝挽詩二首

即事

庚申元日

送楊明夫郎中挽節閩中

壬戌立春

賀吳興郡王生日

登四望亭

閑居即事三首

追悼親哥

久雨無聊成兩詩寄秀叔并簡繼韓

京丞相挽詩三首

送僧惠日歸蟠龍山

金夫人挽詩

萬宣教挽詩

汪貴之挽詩

周仁甫挽詩

盧夫人挽詩

題白蘋亭

送游大治歸建陽

趙處州挽詩二首

嘉定庚午二月望日留越上偶成

謁告成廟

遊稽山

題大禹廟

追悼昭叔弟昭叔弟不祿數年夫婦皆未葬危
坐悲念時自吳興罷官来越上候歸當為卜
地此所以誌也 贈巖電道人

游景德

即事

食楞梅

會稽六月初五日新米入市價減舊以升計之

凡十二三聞海商米舡方集亦損其直

江亭晚望

舟行到滿塘

秋風

雙溪即事

西興阻風

密室

久雨而雪

嘉定壬申十二月二十八日夜雷

新晴

和董叔重韻

題黃元靜廣先樓

將使有詩欲移具相邀到雙溪因次其韻

和清老韻

哭吳曜遠

俞義夫挽詩

石倅宗卿挽詩

嘉定九年九月二十九日到思溪庄避人事十
月初四日過生朝方歸初三日早恕子遣人

來送酒食并詞二闕因成唐律二首

與滕元英自武口至湯郊不過十里元英一年

不相見丁丑正月來訪留一日問其再來以

秋為期因成唐律一首

贈平首座

嘉定丁丑十二月謀葬貴孫老病不能與事但

此心傷痛因賦小詩以寫其哀

七月二十三日遣懷

二十五日聞德瑩弟計音越三日悲不能禁以

小詩自解

卷之七

七言律詩

緩步

朝陽

醉松

和韓毅伯詠鴈

石盆荷葉

窓外紫竹

秋日晚晴

和韓毅伯見寄

喜祝季通相訪

和祝季通

南齋中秋小酌

南齋書懷

和韓毅伯三首

復和前韻三首

追念鱸溪老人二首

春日書懷

送詹少遊之平江 春日書懷

得昭叔弟書 賀景高新居

元日書懷 蒲圻道中遇雪

和游堯臣出郊二首 送游大治歸建陽

和沈粹卿南樓韻 和寥守岳陽樓韻三首

和劉獻之出郊勸農

和游堯臣勸農韻 題胡道士草菴二首

旅中書懷 到壽安精舍

歲莫官舍書懷二首 旅中思家

留山間即事 出郊書懷

野次遇雨 酬陳叔衲四首

上巳 贈李秀才

春日叢桂書舍偶成二首

用前韻答彌明聖言二首

再用前韻答繼周丈二首

家僕來叢桂告米粟不繼

和謝安國韻 秋懷二首

雪中官舍獨坐聞薪炭翔貴因成長句

蕭叅議雪中宴客朱僉判有詩因次其韻

和林寶文鹿鳴宴韻

和王右司遊南岳得晴

九月到白石先妣塋所

丙午中秋夜次韻李仲永携詩相別

和至卿叙述三首 和至卿述懷二首

次韻韓毅伯病瘡 和韓毅伯述懷

和韓毅伯擬別 江上為韓毅伯訪得便舟

再用元韻二首 次韻韓毅伯別許宣教

題岳陽守張仲駿浮光亭

題月臺 縣圃黃梅半落草間

招同官諸宣教一飯用舟字韻成拙句

飲闌月上不能留客再成一篇

斛官到郡諸丈置酒岳陽樓招矣為客鄧巴陵

索詩

和程丞遊清水岩黃龍山韻

和陸簿九日二首 溪上尋梅不遇

次韻答熊朝英 復次韻

和王宗禮送行詩 和陸簿韻

和黃子山韻二首 用元韻答徐幼文

和陳丞彥能韻 和吳夢授韻

和王文州詠雪韻 再用前韻

游閭皂

陳張甘三道士和篇繼至用原韻併謝之

次韻巴陵羅簿送行二首

次韻楊秘監館中即事

次韻午睡不知雨作

次韻楊秘監館中留題

題徐商叟叅議儒榮閣

游劉寺次林子長郎中韻

汪秘校携詩竝雪月二賦相訪次其韻

次韻胡連翁携詩相訪

和陳右司春雪

胡清卿來訪留一日亟求去云欲謁鄭宰因以

詩佐其行

次韻謝胡清卿

汪直卿相招以病爽約因成拙句併子大

秋旱得雨子大詩言祈禱所致災謂不可貪天

之功次韻以見區區

郡中游觀之地清風樓為第一前此諸公有詩

似覺摹寫未盡輒成唐律一篇約魏倅同賦

不拘和韻可也 和項廣文喜雨

與魏倅葛書記同謝雨于黃龍洞回憇小玲瓏

晚飯魏倅有詩次其韻

賀皇太子生辰

題碧澗亭

浮碧亭

題墨妙亭

二月中休日黃帥領客登望海亭有詩次其韻

六客堂

魏倅和鈺老一詩因次其韻

兩鶴

和陽郎中北廊梅花

次韻答清卿并簡蔡尉

寄德瑩弟二首

附錄

朱晦翁和韻二首

贈地理游曉山

病中恕子投劾同歸

清明日先塋掛紙錢

又和早雪韻

病中書懷

再贈平首座

七歌

凶年慨然嘆久生成贅因以長句述此意

卷之八

詩餘

詩餘序

蝶恋花

蝶恋花

點降唇

水調歌頭

又登石鼓合江亭

念奴嬌

鷓鴣天

阮郎歸

浪淘沙令

清平樂

卜筮子

虞美人

憶秦娥

好事近

念奴嬌

採桑子

臨江仙

木蘭花慢

阮郎歸雪川作

水調歌頭

好事近

南柯子

西江月

踏莎行

南柯子

臨江仙

憶素娥

青玉案

木蘭花慢

浪淘沙

江城子

南鄉子

臨江仙

水調歌頭

浪淘沙令

好事近

卜筮子

小重山

臨江仙

南柯子

朝中措

朝中措

柳梢青

清平樂

夜行舫

驀山溪

滿江紅

玉樓春

卷之九

序

送齊彥邦序

送黃夢符序

送滕彥真序

送相士張舜舉序

送韓毅伯序

送劉監序

送彭雲翔序

韓毅伯詩序

林待制奏議序

清江集後序

程允夫集序

魚鱗保甲編序

尚書小傳序

本草正經序

五顯靈應集序

松牕醜鏡序

讀易筆記序

東都紀年序

送洪宰序

送江靜之序

鱗溪老人集序

東山集句詩序

劉弊撮要序

送吳夢授序

送曾洪父序

二堂先生文集序

綠淨文集序

南窓雜著序

冰玉老人集序

樗叟詩集序

送曹成之序

懶翁詩序

祖墓經界公據簿序

續九族圖後序
世系錄序
贈姪彞鄉序

卷之十

記

醉經堂記
汪端公墳祠堂記

逸老堂記
文富軒記

東園記
雙溪園記

卷之十一

書

見程司業
見洪宰

見張南軒書
見林鄂州

上林鄂州書
見劉司業

上劉司業書
上蘇郎中書

上王右司
上盧岳州

上劉岳州

與朱侍講晦翁論諒闇中開講書

上趙丞相
上留正丞相

上葛密院
上胡晉臣叅

上執政
上趙大資

上宰執
答吳學論

與潘徽猷

與徽許守

上蘇郎中

上章岳州

上薛大監

上孫漕

上趙帥

與杜仲高

答凌解元

上宰執撥米賑濟

與雷知院

與婁同知

付恕子

卷之十二

表

太上皇帝聖誕賀表賀皇帝

太上皇后聖誕賀皇帝表

太上皇帝受尊號賀皇帝表

太上皇帝皇后加尊號賀皇帝表

賀正表

賀生皇子表

請皇帝御正殿復常膳表

慰皇帝表光堯太上皇升遐

請御正殿表皇太后升遐

請聽政表

賀講和表

謝曆日表

謝冬衣表

謝除制帥表

進易解表

進東都紀年表 賀太上皇帝慶壽表代

賀太上皇帝慶壽表代 賀太上皇帝慶壽表代

今上皇帝表 賀太上皇帝慶壽表代

賀太上皇帝尊號表代

賀太上皇加尊號表

賀登極表 賀郊祀表

賀天申聖節表 賀會慶聖節表

進賀瑞芝詩表 進日曆表

請皇帝御正殿復常膳表

請聽政表 請御殿表

謝到任表 謝除經畧表

謝生日賜物表代 賀重華宮

賀文德殿 賀重明節表

賀瑞慶節表 謝郊祀赦表

謝曆日表 謝侍讀表代

謝加食邑表代 謝賜衣帶鞍馬表代

饒州到任謝表 請聽政表

請御正殿表 請聽政表

湖州到任謝表 賀立皇太子表

賀改元表 慰皇帝小祥表

賀太子遷東宮表

卷之十三

箋

皇后箋

太上皇后箋

太上皇后箋

太上皇后箋

皇太后牋

賀慈福宮箋

慰皇后箋

賀太上皇后加尊號箋

今上皇后箋

今上皇后箋

太皇太后牋

皇后牋

慰皇太后箋

慰皇太子箋

皇后牋

皇后牋

東宮牋

皇太子牋

皇太子牋

卷之十四

啓

上張南軒

賀李侍郎致政

登第後謝舅氏汪仲和

通韋倅

上譚提刑

謝李椿侍郎

謝潘憲

通向倅

上張總

上周丞相

答劉監酒

回蔣教授

謝縣官

回黃少卿

回武舉李状元

回趙教授

回林院

饒州之任上吳提點

回諸縣宰

通趙路分

謝臺諫

通致政王温州

通陳主

通陳知監

回交代周郎中

謝從官

謝孟漕

答韓總管

答魏倅

答長興安吉知縣

答烏程歸安德清武康知縣

謝王縣丞

賀吳興郡王

通孟守

與王監承

賀徽州趙守

回鄭宰

答永興鄭宰

謝林竇文

回楊宰

賀施參政代

賀隆興程帥

賀湖北吳憲

回袁州曹守代

回全州趙守代

回馬宜州代

與靜江詹帥代

謝廣西詹經畧代

賀使舍人代

回趙機宜代

賀王侍郎代

賀史使侍郎代

回趙道州代

賀趙總領代

回趙知軍代

謝宰執

謝宰執代

回趙參議代

賀王侍郎代

賀吳提刑冬

賀吳提舉冬

賀汪提舉冬

賀京運使正

賀吳提刑正

賀趙丞相春

賀曹守正

賀趙丞相春

賀蔡總領春

賀汪提刑正

賀馬提刑正

與鄧教授

與趙節推

與饒節判

與梁知錄

上林倅

答陰學諭

上趙丞相

賀荆南師閫侍郎

賀岳州田倅

賀梁總領

與周知錄

回唐解元

回胡解元

回徐尉

回彭秀

賀薛漕

賀張總領

謝岳州劉守

代謝張尚書

代賀張尚書

代回丁茶馬

代回吳兩府

賀石宰正

賀趙宰

賀詹守正

賀孔守正

賀鄭宰正

賀趙丞相啓代

謝劉司業啓

謝呂鄂州

上周總領啓

回趙運判啓

與郭判院啓

賀李參政啓

賀王倅啓

回李監庫啓

卷之十五

考古雜論

禘祫論

郊祀論上

郊祀論下

明堂論

宗子論

周禮經

運氣論

卦變論

卷之十六

劄子

又畫一劄子

申宰執湖州

申宰執乞權任造甲

申宰執乞降度牒造甲劄子

申臺諫劄子
申省論馬料劄子

申宰執撥米賑糶劄子

申省乞休致狀
與雷知院劄子

與樓同知劄子
申請樞密院公劄

內小帖子
再申省

申省狀
內小帖子

再申省

卷之十七

銘
贊
謚議

雙溪文集卷之一



宋軍器大監金紫光祿大夫婺源

縣開國男食邑三百戶王炎 著

古賦

竹賦 并序



小人之情得意頡頏自高少不得意則摧折不能自
守君子反是竹之操甚有似夫君子者感之作賦以
自箴

晦叔讀書南齋之上門巷僻左交遊日稀環以桑麻之
場帶以瓜芋之區路折西南萬竹蒼然下緣乎曲澗之

涓其清可以延風月其高可以擾雲霓珊珊乎鳴蒼玉
之佩搖搖乎舒翠鳳之旗森森乎甲冑之雜崎而切切
乎矛戟之參差其偃蹇挫折者如忠臣烈士赴患難而
不辭其婢娟蕭爽者如慈孫孝子侍父祖而不違其挺
拔雄勁者氣毅色嚴又如俠客與勇夫其孤高介特者
格清貌古又如騷人與矍儒予雖朝夕吟嘯於其下曾
無以名其美而狀其奇然泛觀宇宙之萬物均涵育於
一氣而有剛柔堅脆之不齊榮者必悴盛者必衰實繁
者易剝色麗者蚤萎惟松柏之有心及竹箭之有筠足
以閱寒暑而貫四時春日載暘山川含滋零露兮宵

惠風兮曉披或萼或條或茁或萑含英吐華夭夭怡怡
竹於是時清而不腴冬日初寒天地積威雪慘兮冰堅
風饕兮日淒川原千里木脫草枯香盡芳歇掃迹無遺
竹於是時秀而不懼今而後見其含德之有常持操之
不移此吾所以無羨渭川之千畝有取淇澳之猗猗願
交於金石邀歲寒以為期否泰兮消長剝復兮乘除秉
吾心之堅石視此君子庶幾

雉賦 并序

之野外見一雉為野人所得悼其輕敵不戒而斃焉
因作賦以自警其詞曰

絳冠兮綠跗翠衿兮錦衣耿介兮自守雄鳴兮鳴隨平原兮淺草徐啄兮卑飛何野人之機巧乃以謀而致之方氣驕而賈勇敢直前而不疑事常敗於輕敵碎身首於須臾肉不登於鼎俎毛或用於旌旗子玉無禮而殞命趙括狂勇而喪軀鄴舒怙俊而遭殺卻至稱代而見尸苟謀身之有異皆災害之所罹翠有羽而就羅雞以尾而為犧鴈不鳴而先烹鸚巧言而長羈信涉世之孔艱雖後悔而何追惟羽族之至靈獨丹穴之鷦雛鷓鴣兮音聲鏘鏘兮羽儀摩千仞而高翔豈矰繳之敢施茲吉人之能事於鄙夫兮何誅

夏日郊行賦

四月維夏先晦二日子王子散策於東臯之上爾汝老農問勞既畢遂曳履乎委巷之間反而息肩乎喬木之側喟然嘆曰以吾流目之所見物化之亟如此哉麥穗穗而餅酣桑陰陰而繭絲麻旆旆而沒人袂芄芄而佈畦蜩解甲而效鳴鶯遷喬而載飛雀逸屋而孳尾烏俯巢而哺雛是孰幹其機緘至於日運而不齊也耶吾聞二氣嘘吸一瞬不留向之溫然者俄而為今日之夏今之燠然者又且為後日之秋所以使人慷慨增懷踴躍自激感歲月之遄邁畏功名之湮沒故志士之競時殆

不容乎寢食如予之推鉞進魯則姑苟安而休息者也
人方逐逐我獨徐徐人方役役我獨于于諒愚知之懸
隔宜動靜之殊塗其在武水之曲有先人之弊廬一裘
一葛日飯一盂非掃軌以謝物且杜門而讀書付榮枯
於自然庶順命而無違抑古人有言曰優哉游哉聊以
卒歲是其獲我私者乎

喜雨賦

并序

丙申夏四月武昌闔郡不雨越五月三日崇陽宰吳
侯以誠禱雨獲優渥按春秋僖公三年春正月不雨
夏四月不雨六月雨說者謂書不雨者閔雨也書雨

者喜雨也喜雨者有意於民也今吳侯禱雨以誠不
崇朝而雨隨之可謂有志於民矣作喜雨賦其辭曰
歲行於涿灘之辰斗建於實沉之次環鄂者之七縣值
亢陽之為沴風自南而且霾日將北而如燬雲霓鬱而
不興旱魃驕而孰禦策余馬於郊牧喧龍骨之咿嘍漉
池涿其既竭陂堰支其斷流視衍沃而龜坼况高田之
未耰苗已悴而半槁懼西疇之不收幾張頤而待哺舉
蹙額而增憂粵桃溪之令君念民命之惟穀茲土曠而
農惰雖儋石而無蓄繫告糴之少艱米翔踴而如玉倘
既月而旱甚民必什於溝瀆講雩祀之故事虛心齋而

竭誠謁梵王之蓮宮羞蘋蘩之潔清款伯伯之靈巖釋
輿馬而草行陰曠曠以隨蓋颺悠悠而擁旌枉礎濕其
有汗鍾鼓鞞而無聲紛舉手以加額曰雨兆其已形龜
日葺儀肅我庭宇駕龍秩攸屆攸止雲將前驅雨師踵
至越三日而為霖罄一同而均利稼芄芄而驟蘇滄汨
汨而如注免為殍於凶年占築塲於樂歲沸輿頌而載
途歌令君之陰賜其歌曰霖霖兮溼濡汚邪兮滿車其
釀兮有黍稻梗兮可炊豈弟之澤民肥不懼我字我撫
公留勿歸均此大惠公歸勿徐老之言何美之溢也向
吳侯聞而哂之曰父也民憂而憂此吏責也今也民喜而喜吏不敢以為德

也然旱而禱禱而雨如重負之獲釋也酌我醕醴旅我
敬核合僚友而一笑吾敢忘夫一帝力

中隱賦 并序

三衢留侯以中隱自處范石湖為書二大字以表章
之侯有中隱對自叙甚詳夫若隱若顯內心泰然不
為圭組所累侯之志高矣顧進於世功大名白民受
其賜侯未可辭此責也乃賦之曰

子留子道高而位下豐蓄而嗇施發揮所有可以雷霆一
世而畏人知之沉酣自得於理義之府盤薄不驚於功
名之場迺以中隱扁其室廬團蒲曲几詩編酒壺凡世

間无物一切無有盖淡乎如逋客之舍幽子之居吾見其鼻間栩栩芻豢顏色殆將貴吾身於隋侯之珠眇外物於秋蟬之翼此所謂與道逶迤一龍一蛇不露文彩如玉如石者耶夫孤竹二子採薇西山揭日月於百世之上可望而不可攀槁項黃馘山澤下士徒悅其風未喻斯旨友麋鹿於閒壙之墟玩魚鳥於沉寥之溪惟陸沉而無用徒牢關而固拒故荷簣於耦耕均聖門所不許萬夫一賢天地間氣海涵岳負以育德游刃迎解以為智陽潛于泉則草木無色雲出于山則膏澤千里古之抱此道者屣脫富貴而無累蟬蛻塵埃而不緇然燕坐一室而經營四海未嘗泊然與世而相違投耒耜而執玉釋板築而乘車萬物賓從受其寵綏蕭條陋巷之布衣詰屈乘田之小吏非為我而不為盖欲為而不遂先生彈冠而出曳履而趨豈無意於斯人而何以隱為漆園傲睨達近乎詭金馬玩世和失之鄙準繩以中又安取此有如樂天可謂賢矣不膏肓於丘壑之下不柴欄於紳脩之間招釋子於匡廬之阜呼酒徒於香林之灘得喪兩忘去就俱閒無乃欲眇今世而尚友與斯人而比肩雖然進退有正以義為主可否無固因時為度元和之際猶莫盡其所懷長慶之後可飄然而引去時既

異而轍殊何必追其故步曲阜之野麟出而非岐山之
陽鳳鳴而宜可隱而見其操卑可見而隱其德孤吾欲
與白傅異議乃申以招隱之詩其詩曰
白銀雙闕高巍巍佩印如斗生光輝藥石之妙國可醫
縮手未試衆遲遲前旒側席九天上青雲發軔過其驅

釣臺賦 并序

自乾道丙戌至紹熙辛亥凡四過嚴瀨此身老矣閱
世寢久更事滋多感念懷古有慨然於心者艤舟徘徊
徇久之遂賦曰
理予舟而東逝兮言將至于中都過釣臺而屬目少弭

節而躊躇山寂靜而江空兮中有高人之祠去之千有
歲兮清風至于今而凜如慨余懷之有感兮思鬱紆而
欲攄昔者卯金嘗一什而載起兮真人翔於參虛群公
攀附其麟翼兮策高足於天衢功烈藏在金匱兮封爵
載諸冊書大冠長劔之陸離兮又寫以南宮之圖先生
適際斯時兮獨深潛乎江湖雖可致不可屈兮思漁釣
吾其竟歸羞富貴孰貧賤兮夫何眇一世而徇馳粵若
聖賢之制行兮其大致惟出處之兩岐一人以伏鉞而
觀兵兮二子餓首陽而採薇君王溺冠而傲士兮四老
遁商崑而茹芝意固各有所為兮非好惡獨與人殊載

考西都之將季兮先自裂其廉耻之維倖倖直勁于闕
下兮忠諫斃于係纍彼豢於寵祿而不去惟其上所招
麾孰肯為我死志兮金城圯而莫_支莽上下其目以旁
睨兮敢挾斗筲而覬覦雄作美新以蒙羞歆獻符命以
導諛可勢軋與利啗兮龜鼎遂隨之而轉移世祖折節
以下巖穴兮蓋懲夫覆轍之車訓仁義而戒阿諛兮亦
豈無於當時重臺閣之繩督兮輕廊廟之訐謨前有軒
冕之榮兮後有斧鉞之誅朝正位於公卿兮夕殞命於
囚徒羊裘逝而不留兮非特先見乎幾微上以警一人
之失刑兮下以厲多士之廉隅噫有國者亂士相尋兮
未始不自夫名節之先隳麟鳳曠世不一見兮是焉可
以繫維瀝酒扣舷而遐想兮乃申以斐然之辭玉帛雖
不到藪澤兮豈無逸民於樵漁私其身不憂其君兮何
取夫遠走高飛而獨居

林霏賦 并序

致政胡丈思成燕居之所扁以林霏模寫其景寄於
詩囊畫筭誦其詩觀其畫令人心脩然厭薄塵垢因
成古賦一首其詞曰

倚蕭灘之北溽萃闡闡之萬家獨德人之結廬却市聲
而無諱開樓觀之淨麗納江山之幽遐疑老僊之一壺

藏物色之清佳招鷗鷺與忘機湛方塘之淺綠衛以竹
君之蕭森絢以蓮娃之溫淑鬱一喬木其參天輸清陰
而覆屋抱虛白而不染攬空翠而可飡酌癭藤之釀玉
彈素琴之無弦睇飛鴻之冥冥覺燕處之超然主人為
誰澶淵居士方時承平家在中土偶赤縣之陸沉隨一
龍之浮渡非無意於着鞭可葺雞而起舞耻捷徑之別
驅甘康莊之徐步張使擅於蜀道把州麾於淮浦回老
眼而內觀笑浮名之絆身遂選勝而卜居以頤神而保
真規子美之浣花摹樂天之香林尊德誼者陪一鳩杖
而春容談勢利者望龍門而逡巡乃相與竊議曰此非

持己之潔而矯俗之迂者歟有卷舒之道而無悔吝之
疵者歟眇外物於螽股而貴吾身於驪珠者歟徜徉塵
垢之外而與喬松為徒者歟居士聞之局局然咲曰斯
言過矣吾何有於是其歸來若差後於淵明其止足尚
庶幾於疏傅既婆娑而即安亦逍遙而無累客乃隳括
其辭以命管城簿寫林霏之佳趣

石菖蒲賦 并序

予書室中有石菖蒲一本鬱然暢茂蓋資水石之清
幽以遂其性此物醫經所論可以延年可以成仙第
人取而食之蒲喪其生矣然則為人養生者非蒲之

頤也因讀北山翁集有水菖蒲賦一篇三折四復詞
既妙麗而興托高遠乃拾其遺論而賦之曰

老石嶙峋金鉄貞兮浮雲所根氣潛蒸兮下漱冽泉玉
鏘鳴兮蹙節盤屈託以生兮附堅涵潤密如積兮四時
清清不改色兮烈日凝冰無能厄兮潛蓄幽馨如有德
兮后土富媪載品彙兮其秀其英拔類萃兮蚪然者松
負勁氣兮惟竹虚心古君子兮蘭有國香儕高士兮梅
也如玉勝靜女兮得土則繁否則悴兮獨根于石孰如
蒲之粹兮有荇有藻產連漪兮可薦可修播聲詩兮亦
有芙蓉媚芳池兮紅衣素裳美且都兮下視其本著淤

泥兮潔淨不污孰如蒲之清臞兮來自澗谷入吾室兮
鑿石瀦水葆翁鬱兮零露宵法珠的樂兮甘雨時濯緇
塵滌兮中心愛之久無數兮方士者流言可滄兮養心
益髓將引年兮一寸九節可登仙兮帝經君錄其言然
兮予乃獻疑進末議兮彭聃最壽終亦逝兮喬松飛昇
今安在兮屑而餌之蒲何罪兮毀璞凋刻玉不幸兮枯
骨抱易龜殞命兮破為蟻樽木失性兮彼美惟蒲吾良
朋兮前有韋編後黃庭兮全真育和共欣榮兮優游卒
歲淡然其忘情兮

水西風光賦 并序

隆興癸未冬龍圖閣待制呂公來守新安覽其山水而樂之後八年卜居于城西南隅榜其樓曰水西風光門下客王炎賦之附于衆作之末其詞曰

古歙為郡山水竒秀飛仙往來窟宅於其中號居江左十州之右至于水西之勝槩又稱甲于一州挾以披雲之孤峯逸以漾沙之寒流昔翰林之詩伯騎鯨而來遊至今墨客騷人無不劇談其高風而漁翁樵老亦能尋訪其遺迹人與景而俱勝首尾三百餘年而不可再得那知神崧夫子之卜居而氣象反高乎疇昔豈非人物為主山川為賓故風光雖滿於天下然大半落莫而無

聞苟有恃而獲傳歷千載而不朽有白傅而知香灘因叔子而知峴首浣花寄聲於工部醉吟之篇輞川托迹於右丞丹青之手况如我公三朝廊廟之壽俊六世軒裳之故家荷紫乎文石鳴玉乎金華一旦丐閑引身而退傲睨於塵煙之表袖手於功名之外遂令水西之聲稱自于今而益大飛檻渠渠壓城之隅予雖未獲寓目於几席之末緬想其臨高眺遠凡可以悅耳目而娛心志者一皆領畧而無遺公舊為伯於此邦留去思於千里父老兒童見公而喜故雖山靈與溪神爭欲回巧而獻技攬波光空翠於真濛杳靄之間閱雲煙沙鳥於旦

暮晦明之際飄然如坐蓬萊方丈而下視人間之世憇
曲几以欠伸撫脩欄而倚徙彼謫仙放浪而一來非可
同日議也無已則猶有太公望之事乎處則釣渭水之
璜出則佐六州之王方 聖天子之側席登耆英於廟
堂胸中之策十未用其五六恐未可留意於山水之風
光

古辭

鳴水洞辭 并序

艾西有澗水自黃龍山西流達于巴陵郡之平江而
注於湘水平江故羅縣以地志考之此水即湘羅之

處曰鳴水洞青山中裂水行石上

流遠望之如曳縞素迫視如撞瓊玉而碎之瀑

徐行則

度石蓋間多沸白如操琴筑音

其石上之窪大小不一皆如 罇錡釜狀水與

石爭怒聲 洞如風旋雷吼兩岬皆峭險不可陟降

蒼松數百株相扶 立枝格偃屈 俯眇崖下

使人神淒髮豎有蕭條遺世之意崖上有轉雷亭韓

舍人子蒼作而 之歲久峯壞惟故址僅存沈粹卿

携酒邀余游其上愛其景清甚欲去復留予不能飲

無累數觴不醉薄暮始歸粹卿曰此景視之不減匡

廬三峽盡之當勝輞川惜其在窮山深谷人無知者
移而近通都大邑其價可值萬緡予謂泉石之奇絕
山靈愛護留以遺幽人勝士非求知於世俗也馬蹄
車轍不至山間乃能全其清耳粹卿以予言為善因
識大槩而系之以辭曰

艾之西兮汨之原山石劃斷兮穹嵌而嶄巖瀑流下注
兮其上絕而為壘有蛟有龍兮伏而不怒雷鳴崖下兮
窮年風雨誰斧鑿此雲根兮遺予以壘洗松有樛枝兮
屋之深深苔蘚斑斕兮織績以為茵觴酒于上兮聽潺
湲西峯啣日半規兮徘徊尤未忍旋予欲緹朱絲兮節

清音而度曲招玄鶴使舞兮醉予醺醪有玉韞櫝兮幽
人之軸秋蘭之佩兮芙蓉之服瘦石寒泉兮天其弗告
四牖隙兮獻寧青青白雲漠漠兮截洞口以為扃輪鞅
莫來兮無傷我清不執券而兼併兮莫予與爭

懷忠堂辭

并序

顏魯公知湖州作放生池又刻碑池上其碑見存池
畔有魯公祠堂題曰懷忠北山程公嘗作楚詞一章
刻石廡下其辭甚古然未盡事實因以辭續之其辭

曰

跂逸駕兮前修佩武符兮典州迹已陳兮德新可敬而

慕兮幾春秋意其在存兮閔于萬年之原謂其逝兮乃在
浮羅之巔奮忠精兮取義貫羲娥兮爛然隘塵寰兮上
征揮八極兮為仙黃鵠脫駘兮素蚪停駟幾彌節兮念
遺民而來顧高弁蒼蒼兮清茗瀾瀾公來遊兮湖山增
美遊觀罷兮來歸有浦與河兮清泠之池魚鳥懷生兮
欣欣焉其有依銀鈎蠶尾兮燦翠珉而陸離絃琴兮擊
鼓羞羔豚兮酌醕跪起以薦兮頌公燕喜公燕喜兮吾
民樂康却災沴兮蠲除不祥雲來兮萬祀蒸嘗兮不忘

古頌

太廟瑞芝頌 并序

聖天子光奉貽謀嗣守神器兢業不懈日親萬幾間
五日一朝于兩宮蒸蒸翼翼問安侍膳惟謹聖孝昭
假天地祐助祖宗顧歆乃慶元五年秋八月壬申王
芝產于太廟太室之兩楹越十日辛巳有司以聞詔
丞相帥百僚縱觀參考圖謀是為上瑞維時近重明
節鸞輿詣壽康宮奉香以進太上燕豫天顏怡懌越
六日丙戌朝于壽康宮款侍至日中具請蹕始還九
月庚寅朔用家人禮奉玉爵上千萬壽于宮中孝慈
洽浹佳氣鬱葱於是公卿大夫及都人士女外薄海
隅無不歡喜乃知國有大慶中外禔福廟社尊安休

證之來符應彰灼如此臣不肖秉筆隸太史氏敬敷
叙本末書于汗青藏諸金匱石室以昭示將來永永
無極又念昔漢甘泉宮九莖效異唐延英殿三花吐
秀與產於廟楹不可同語而一時群臣動色相賀歌
而詩之以自夸詡載于方冊猶為談美今瑞不虛出
慶事鼎來福祿漫羨是宜被之管絃播於樂府以鋪
張無前之洪休臣職在鈇輦啗無歌咏附于英莖之
奏則歸美報上義誠有關心甚懼焉謹拜手稽首獻
頌曰

宋紹天命列聖重光丕緒烏奕施于無疆少海日升慶

元五祀淵默面南格于天地於穆清廟玉芝呈瑞
其華麗于丹楹匪根斯殖匪葩斯榮和氣融液不春而
生其瑞維何祖宗成喜神孫致孝孺慕無己有開必先
產祥墮祉其孝維何神明可通問安寢門四輔翼從洗
爵為壽雍雍在宮莫大之慶朝野攸同賚爾高年曰予
錫類頌爵輔臣曰汝予助三宮豈樂萬姓歌舞維我高
廟中興集勲神器可傳藝祖之孫重華之斷壽康之仁
凝神冲漠不俟倦勤群黎屬望天啓元子四聖揖遜千
古顯美主鬯匪易秉心肅莊以奉重闈媚于慈皇崇德
尚賢心膂股肱盡擯浮偽慈皇是承醕酢萬微未明當

雙溪文集卷之一
依不蔽不疑慈皇是以民附于仁天監厥誠對越在上
祖宗之靈既以瑞物昨其德馨昔在紹興芝嘗再茁仁
英二祖之室曾孫篤之克肖其德受是令符寵綏四國
曷以祝之萬壽無極又曷申之子孫千億有德有瑞隱
顯合符自今以始吏將屢書皇德日新勿替厥初

雙溪文集卷之一

雙溪文集卷之二

宋軍器大監金紫光祿大夫婺源
縣開國男食邑三百戶王炎 著

五言古風

飲馬長城窟

春風塞草青胡兒區脫靜秋風塞草黃胡騎角方勁秦
人驅丁夫築城避強胡城成有虧日胡來無已時哀笳
終夜起戰馬豎雙耳蒼茫沙上月幽咽隴頭水征人悲
故鄉閨人守空房安得霍嫖姚飲馬瀚海旁

門有車馬客

烏鵲逸屋鳴有客停征駢問客何自來君家寄家書攝
衣起迎客開書多苦辭薜花不長好玉顏亦易衰水行
有脚流人行無反期置書拜謝客豈不心懷歸事君有
明義不得顧所私作書附客返路遠幸勿遺上言重自
愛下言長相思相思勿相怨自古多別離

出塞曲

羽檄走邊遽虎符出精兵壯士卷甲起骨肉送之行擊
筑歌易悲挈榼酒更傾關山殺氣纏寒日無晶明箭落
紫塞鷗馬裂黃河水豈畏虜騎多只憂將權輕聞外不
中制一賢當長城鼓行渡沙磧願勒燕然銘

遠離別

靜女不下堂遊子志四方五花驕馬金絡腦出門僕從
生輝光草青沙軟濕春霧玉蹄聯翩踏花去樓頭明月
闕又圓西風一夕生庭樹明璫綴以木難珠錦衣繫以
貂襜褕青眉玉頰為誰好天闊飛鴻無素書今年花落
容華在明年花發容華改離鸞別鳴不自憐人生難得
長少年

薄薄酒

薄酒可成禮何必飲上尊醜婦可成室何必求麗人人
生有欲皆求得誰能有得終無失多歲未免誨穿窬厚

味亦能生疾疾青鞋緩步可當車不用駟馬黃金羈茅
簷之下庇風雨不用丹碧文棖題緼袍布衾亦自暖不
用狐裘蒙錦衣菜羹脫粟亦自飽不用五鼎羞鮮肥月
盈不償闕物盛必有衰逐客可相亦可夷餓隸為王又
為道欲從意滿神所忌吉凶反覆相乘除吾聞猩猩罵
人非不智以醉就擒猶惜屨龜鼉窟穴深更深卒為人
得由貪餌古來達識照其幾外物視之雙弊疑於陵辭
聘寧灌畦禦寇辭粟寧忍饑逃榮無辱二疏去今是昨
非陶令歸請君莫嫌薄酒薄瓦甕匏尊任斟酌請君莫
嫌醜婦醜荆釵布襦與偕老天寬地大得自由如此足

矣何多求

夏日過雨

雲潤日杲杲渠澀泉泠泠群山曉過雨一沐千髻青岸
巾納微涼庭戶留餘清喬木俯佳色野卉含幽馨昔來
挽枯條今來見欣榮榮枯亦何有對此難為情長年心
事多撫髀只自驚冰炭交中腸吾生安得寧好風吹我
裳頗覺耳目醒暇日可少憇安用心營營高卧綠陰底
玄蟬相對鳴

村行

二篇末第時
在大坂作

青山護村落暗通溝渠人行木杳間漫漫迷所之里社

壓新醪擊鮮賽叢祠田父相勞苦雨暘無失時龍骨掛
屋檠秋熟可預期行行度岡澗泉石多幽竒微風發清
籟好鳥吟高枝此中有佳趣豈無幽人知去住兩不可
空吟招隱詩

雪晴即事

宵爨懸釜星曉光落窓牖鳥鵲如諂人賀語亦交口收
盡白糴逾青山併還舊門巷未掃除家僮具箕帚物色
不招挽顧盼左右有梅兄可納交竹弟亦耐久毛錐得
佳助引我琢句手酒國百無憂問津其敢後逐逐春意
來孤村又花柳

呂待制所居八詠

半隱
舒嘯

緩步
月臺

藤洞
歲寒

朝
醉

半隱
此錄其二餘
見別卷之下

舉世競寵利嗜進無肯休山林槁項輩又乏經濟謀竭
來半隱察再拜瞻呂侯袖手辭富貴結廬清且幽我從
為兒時久矣聞風流父老數時賢若人真少儔已覆金
甌名姑作綠野遊四海望霖雨爭欲挽之留向來釣璜
老一出扶宗周廊廟方側席公肯幡然不

歲寒

春暘競撫媚百卉顏色好涼秋風露來徃徃競枯槁一
朝受霜雪脫落遽如掃特立金石姿青青未嘗老下視

軟美葦摧折不自保古人幾失言疾風知勁草

遊硯山

他山石徒多寶器匿幽僻產璞芙蓉坑金聲而玉德岡
岬外鉤聯地勢中斷隔曲塢八九家路入羊豕迹澗水
抱石根石髓多紺碧北山上挽天南山勢蟠伏硯工一
百指日鑿崔嵬腹篝登礪斧斤深入逾百尺我行冒風
雨周覽不知夕夜宿茅茨下青燈照岑寂酒闌呼匠氏
訪之語纖悉冰蚕吐銀絲蚊人織霧縠巧手琢磨之價
值千金鎰斷巖半傾欹舊穴久湮塞旁求得他材飲水
不受墨堅滑已支靡麤燥乃藏獲信知天壤間尤物神

所惜罕見固為貴有亦未易識琢玉混一區語盡三嘆
息摩挲蒼蘚崖此言可鐫刻

春日書懷二首

杜門值春初出門已春莫子規日夜啼為我訴春去萋
然草彌望綠暗谿臯路百尺游絲高搖搖引心緒歸來
坐窓底有句不能吐喚取黃妳來且嘗黑甜味
餘月雨新歌風日亦已和佳木頗秀整好鳥仍嘯歌今
我若不樂如此春意何喧寂有異境窮達元同科此道
貴堅壁外物將倒戈有慨懷古人執柯能伐柯

答韓毅伯五首

以遊子莫句
之為五韻

為別未一日思君如三秋邂逅孤城中握手復少留士
方未遇時鮮不困宦遊君獨芻豢色胸次回萬牛自愧
得之淺誤欲代君憂白壁識者稀駑馬市者稠莫作分
外慮輕重終不謀諸公競推轂失士固所羞
情義如投膠去意如激矢險阻要備嘗山川餞行李雪
霜衣裳單燈前話兒女下堂辭親去上堂拜親喜燕頤
能飛揚何必毛錐子

憶君初至時投宿村店莫門巷冷如冰漫刺來一顧升
堂方下榻出戶復就屨絺袍寒不溫北風攬庭戶念君
何以堪此意推不去強飲登前途為親善調護

老松寒不凋古井風無波斯人閱千古所得亦已多句
法餘事爾高處凌陰何寧為擁膝吟無作扣角歌
三書上時宰我常擬退之士窮且素守躁求亦何為蜀
客聞此語為我一解頤歲晚歸未得且過江之西未到
意先喜主人賢足依江西魚稻鄉米熟鰲蟹肥不妨且
醉飽利達自有時

漁人

西南月未墮白霧吞青山渡口無人行老漁一舟還呵
手繫短纜襜褕犯夜寒捕魚養妻子誰謂斯人閑

送游堯臣歸閩中六首

荆璞天下珍價重金百鎰誰能玉其德有亦未易識陸
沉黃綬問心不計喧寂挽之置通津誰惜一臂力窮山
抱白虹緹襲貴燕石
良農種嘉穀未必皆歲豐世事固無巧得喪係其逢汾
上百斛鼎嶧陽七絲桐清廟不登薦造物頗未工不移
金石心前哲能固窮
攫金不見人士以貪自欺玉壺自冰清皎皎不受緇畏
義如畏刑律已吾所師一尉百僚底三歲袖手歸鄙夫
有泚行李惟囊衣
宦遊適四方僚友凡及弟所惡薰有猶氣味不相似黃

鵠來自南俛首啄禾黍意欲摩雲霄石交予與汝鷄鶩
安用喧短翼無遠舉

火流暑將退車馬戒行役可不舉一杯明日川陸隔北
堂太夫人綠鬢今已白雖雖鳳將離此樂豈易得軒冕
儻來爾為親謹眠食
松楸不掃洒吾甚思江東七閩在其南雲間無去鴻關
山共明月何時一尊同小遊忘年友努力翰墨功鑄金
作顏淵世豈無國工

送張飾之

俗子問寒溫吾儕相爾汝二年坐窮山蛛網懸一塵剝

啄誰扣關欲語不敢吐有客騎鯨魚迎之倒雙屨家聲
本光融人物亦英偉胸次蟠江湖筆端走風雨贈我瓊
瑤章白虹貫囊楮我如穿鼻犢涉世多齟齬君如側翅
鷹雲路未軒翥盃酒接殷勤從談傾肺腑百圍飽雪霜
士要嘗艱阻傳說起胥靡夷吾出囚虜淮陰有寄食新
豐有逆旅饑饉必豐年乘除乃天理豪傑就功名但問
歲寒爾相對一掀髯窮通忘愠喜

題陳叔適軒

逍遙鵬鷗游小大各有適士墮躁欲中束身就微墨桃
溪有市隱被褐懷拱壁袖手閱世故不變芻豢色小窓

一蒲團燕坐琴書側豈不對客語青眼送鴻翼自言肥
遯好外物斷欣戚千金戒垂堂一跌在所惜笑我踏風
波轉駒窘羈勒

梅花

歲暮殺氣慘草木華葉萎寒梅吐新萼娟娟擁疎枝清
意塵俗遠幽香風露知孤絕慣守獨晚出甘後時細推
萬物理榮謝相乘除桃李向來繁試問今何如

秋懷五首

簡陳巽叔
徐伯老

西風脫教葉木末秋有聲團扇內篋中肅肅庭戶清公
退頗無事解衣坐東營本乏宵漢心未斷丘壑情日月

不肯留奪我雙鬢青陳編堪解頤涼夜親短檠
涼風挾秋回蒲柳青欲黃桂樹枝相膠采采含幽芳清
香美無度坐憂露為霜志士有所懷後時多慨慷
西南天漢流蟋蟀鳴露草黃鵠垂其翼坐看歲年老寸
陰輕尺璧進德恨不早百圍飽風霜蹭蹬何足道
我來今幾時寒暑已一變回首望江東天未行鴈遠孤
矢四方志別離詎能免有懷先君子生理只鉛槧相憶
可相忘問學當自免

我家南溪上老屋四立壁俗子呼不來巷無車馬迹公
庭有將迎未免眼青白陳徐臭味同吾獲雙拱壁拂我

榻上塵與君高六籍

又五首

以遊子悲
故鄉為韻

一身將百指就食家浮游清霜木葉黃弊筭無完裘平
生三釜心山河種松楸圓枘運方穿命不與已謀盥濯
朱墨手清江操釣舟
擇友得石交心腹管城子可憐老而禿我窮正坐此珍
瓏玉其音六學有妙理抱此為身媒前賢恐不爾翩翩
肉食飛書生懦於武

東風黃鳥鳴白露寒蟬悲晝何太短種種髮欲疎日言
了婚嫁此事今何如欲耕無一壘兒女牽人衣屐以繭

自纏深念難為娛

跣走我足傷涉世無夷路三復貝錦詩詭口古亦惡兒
女附耳言譽喜訢其怒勿用驅青蠅玉質自如故
竹間有數椽讀書樂未央稻梁自為謀風散鴻鴈行叔
氏從我來季子天一方人生手足愛念之攬中腸誰不
思息肩我豈無異鄉何時一青燈夜雨對同床

用前韻答黃一翁五首

天寒鴻鴈客子亦倦遊憶昔少年時風埃蔽貂裘欲辦
一束茆不種千章楸黃鵠入鷄鶩亦為飲啄謀豈有
斗升水能行千斛舟

吾友西家黃筆力壓徐子金門可曳裾胡為亦留此整
整挿架書拂蠹自料理三年飛不翔袖手今且爾儀鳳
五色文霄漢終接武

楚客抱玉泣荆足只自悲有寶不韞櫝此計亦未疎子
虛一賦成日邊問相如老眼閱人多君豈一布衣篋中
有瓊瑤把玩聊自娛

秣馬踐古轍經術導先路士要人品高與俗殊好惡忤
心蠱尾毒禍心螳臂怒唾面令自乾吾今乃非故
青雲諸貴人鳴玉朝未央我無封侯骨難入鸞鷲行生
女不出門生男志四方十年九不就食糞苦我腸未能

返故園且可歸醉鄉細君論此懷春溜鳴槽床

平江道中

筍輿踏瘦石揮汗日亭午山斷忽眼明人家住溪澗解
衣近綠陰隔枝鳥相語好風送涼來坐久失畏暑潭潭
一水綠可以洗塵土樵歌響空谷漁艇散前浦丘壑太
寂寥從俗只自苦征夫問前途欲往空顧行

松檟如蒲圻訊民之食菜事魔者作詩憫之

三代日方中為民破重昏既蝕復光融孔孟道益尊古
禮今則亡陳編意猶存飲燕用觥籌薦亭羞羔豚瞿曇
何為者髡首徒然繁不飲非畏義不殺非知仁舉世昏

不悟跣足行荆榛貽禍產妖幻與佛岐又分俗愚有星
悞吏議多深文怒言必溢惡疑似恐不根黔首亦何罪
可憫不可嗔大道若反古怪說難眩民帝居虎豹守此
語誰叩關

題咸寧江宰德先清遠堂

築室俯平湖百頃風漪連湖底行白雲湖外橫青山仙
官踏兩鳧游戲來人間清都在天上欲去懶着鞭百里
可盤薄苦無敲朴喧試出持鰲手為民奏鳴絃潘郎兒
輩爾栽花作春妍淵明未甚高料理種秫田捲箔坐繩
床香吐一縷烟白鳥入空濛飛鴻度雲邊箇裏不着愁

心與物共閑漁郎勸客餅玉色亦粲然目極意不盡老
蟾生暮天

生朝無以自慰作留貧薦一盃
私居飯半菽官舍食無肉何乃太清生囊無一錢蓄人
言骨相寒有智不如福貧者輕於葉富者重如玉輕重
信然否世情手翻覆相彼守錢虜無厭溪壑欲口不談
古今枵然瓠壺腹渠固笑我懼我亦笑渠俗珊瑚數十
株胡椒八百斛冥冥鬼瞰室一跌赤其族未若貧而安
高枕睡常熟我家雲溪陽歌側數椽屋屋後蒔菘韭屋
前種梅竹室中四立壁但有書讀世故驅我來營此升

斗粟仕不上青雲何如返耕牧頗怪草玄翁乃謂貧
可逐卒歲一布裘終朝一饘粥此外復何求吾生無一
足

用前韻答黃一翁二首

緼袍敵狐裘晚飯可當肉諱窮竟未免豈不畏儲蓄嗜
利顛有汎恐懼 王福財固禍之媒越鄉忌懷玉居者
座右器已滿即傾覆聖賢用功處清心而寡欲於世淡
無求乃能實其腹誰令入青山形失策混流俗黃子振鷺
資筆力扛百斛笑人龜手藥欲售先聚族知予頗清苦
應物未圓熟游宦不能巧俯首立矮屋鍛鍊知精金初

寒見松竹自立不堅定庸行徒聖讀誰謂漆園高俯首
欲丐粟窮作扣角歌老厭淄川牧古道寢斷喪時人方
逐逐有田南山南可辦一盂粥請麴歸去來世路早收
足

豆羹米藜藿鼎食厭梁肉士欲齊得喪胸次要涵蓄我
晚頗聞道寧有慧無福外物皆浮雲此道等珠玉閱事
如閱棋已過安用覆田光照諸妄稍稍淡無欲與君共
玄談一笑時捧腹更以詩留貧此語頗驚俗細者首稽
盤豈減檳榔斛見金不見人此輩非吾族君獨臭味間
吾固知之熟平生求益友今日竝墻屋不肯兄事錢寧

以君呼竹力學追古人經史費抄讀我方病少瘳擁衲
膚有粟百念漸灰冷有牛不須牧君如汗血駒墮地必
馳逐甘為走跋跋耻作雌粥粥有玉未嘗獻豈憂終則
足

賀林監生日

玉融秀參天人物時炳靈小春氣候佳產此千人英酌
酒為君壽不惟祝年齡君家屋渠渠鶴髮居中庭前有
棠棣秀後有蘭芽馨安用執象簡始足為君榮置身瓶
盎間恐損雙鬢青試占眉間黃身閑即蓬瀛

和趙行之三首

未暖柳梢綠已暖花梢紅胸次有天和本與春意同士
戒溺於慾物忌居其雄西山有理窟一室惟清風
義利毫髮間其末分舜跖葛藟多攀援喬松但孤立陽
驕貪芳飴鴆雛食竹實知道貴含光露芽多招敵
轉喉有觸諱拭面即逢嗔刳心踏風波未免悔悟生葵
猶衛其足沉此千金身山林本逍遙無虞莫從禽

秋旱得雨

下田出龜兆高田半黃埃禾穗枯欲死益以蟲賊災鉦
鼓競禱祈民病神所哀劃空走笑電隱地鳴怒雷雷將
為前驅頗送甘雨來老穉喜欲狂稍覺生意回鷄豚賽

秋社屈指萬新醅米價免翔貴我亦懷抱開涼聲逸松
稍披襟可徘徊執熱汗如雨得此亦快哉短歌當此謹
因以侑一盃

到城南瞻南軒先生遺像

此以下潭洲所作

八門荷香淨步履柳陰濕欲寫情鬱陶翻引興蕭瑟瞻
望堂中人玉色而山立六學妙經綸未試百之一身存
天下望身沒海內惜此道付誰傳丹青但陳迹樓邊好
山近竹底涼風入兩鶴韻亦高導我轉湖側獨游何太
清滯念亦何釋門關莫返鎖頤言日散策

用前韻答彪講書

薄游城南園墮睫衣襟濕斯人見騎箕有客猶鼓瑟凜
然氣如生可使懦夫立當時道義交彪子居其一嘗試
問所疑傾倒無吝惜逝者不可作往訪杖屨迹亦欲返更
徘徊遠岫邀日入緬惟經世心伐輻置河側立朝道不
容憂國意難釋敢負門下知晨夕自警策

送李侍郎歸州二首

有啟見
十卷下

繫纜南風直轉柁北風微輕雲雨來涼意生綵絺江
神真解事穩送六幅蒲蓬窓卧胡床鷗鷺相追隨落帆
衡陽岸親舊迎公歸兒童競挽袂父老前將鬢明時有
勇退晚歲善自頤稍添數髭白不改兩頰朱松菊對主

人亦有清而腴門外無車馬室中有琴書青鞋時出遊
不用藜杖扶脩然萬物表意得樂有餘乃知上要津不
若還幽居

道重物自輕心清內無慾未定胸中見難行天下獨冠
蓋上青雲着鞭競馳逐南山有德人一笑遺寵辱歸然
殿諸老足以鎮浮俗一出上禁林再出擁牙纛本無圭
組累歸去便野服譬如山中雲潤澤滋草木未雨出巖
岫已雨返幽谷明月共尊壘清風滿松竹問誰從之遊
韋編能熟讀人生了婚嫁意願何時足儻肯割半山誅
茆從卜築

和謝安國求硯

靈均葬魚腹賈傅問鵬臆
挽我來訪古窮鬼信有力
敢恨客羶寒私喜無吏責
稍稍集韋布時時論文墨
濯纓湘水清拄笏西山碧
陶泓耐久朋笑我玄尚白
今代謝叔魚人物居第一
詩來招石友願費黃金鎡
冰綠固稀有霧縠亦罕得
何以報明珠更覺意羞澀
回首歛溪上寂寞子雲宅
當求玉堂樣持來獻詞伯
胸中五色絲一用可華國
視草須若人携之上文石

和謝安國韻

潭州作

虎豹嗔人上九關不妨拄笏看雲山
家聲元是封胡後

人物還如晉宋間解組聞公真有意
折腰顧我亦何顏
故園無地開三徑敢說歸耕是等閑

送謝安國歸清江

軒冕喜而憂山林靜而閑寵辱皆妄事
請看夢魂安世人悟此少低頭縛微官
足跌尚欲趨翼倦不肯還謝公湖海士
着眼高塵寰心如玉壺冰當暑氣自寒
懷壁不願市懶上青雲端親朋勸之仕
晚出彈其冠未合據槐廳亦合登蓬山
造物拙用大束帶來侯藩掉頭厭多事
袖手思故園眉間有黃色鏡裏猶朱顏
家住玉筍西別有壺中天千畝稻秣肥
三徑松菊繁妙得詩酒趣少作

杖屨緣鴻飛霄漢外蟬蛻塵埃問我方自窘束仰屋坐
長歎欲歸苦無田野塵念豐單老驥困短轅終當抱琴
書從公掩雲關

冬日書懷四首 湘中

治身如治玉所貴無瑕疵美玉不顧市身修豈求知人
生為糊口乃爾歛板趨漸失兩鬢青莫洗雙袖緇勿用
懷不平弦急聲易悲
齏鹽雖淡泊義理極雋永士唯知此味未語已相領同
流有溜澗何用勤造請不敢眼青白口語心未肯平生
環堵中三徑自冰冷

客來倦捉麈客去徐挾書兒曹厭官冷數問何時歸豈
知庇風雨未辨蝸牛廬老我懷百憂入自一解頰雨流
木偶行久矣無定居
結茆綠陰下四壁但圖史時亦有好事相過款名理捨
之學宦遊蓬轉不自己豈無山水音塵埃被綠綺幽夢
逸雲溪擘舟弄清汎

賀東宮誕辰

萬國乾符正千齡鼎祚長春祺膺眷顧甲觀肇休祥紫
極聯前曜青宮位少陽五雲凝喜色重日爛榮光繼體
臨崇福承顏侍未央犀簪群俊表象輅兩宮旁氣接金

莖爽天開火德昌
慈皇年有永大帝壽無疆
欽愛誠彌篤溫文德自彰
喬枝方疊蔭瓜瓞浸垂芳
儲禁銅扉肅宮僚玉佩鏘
旌麾張十戟荀簾列三廂
恭命來南紀馳情望左坊也
叨持虎節莫預獻鸞觴
海潤涵群彙霞褰映四方
頌言申戩穀夷夏仰元良

賀林實文生日

乾健運元氣斗杓默回旋
千歲生一聖半千生一賢
問世有異稟天意非徒然
皇極存人心俗學無自得
天意興斯文公獨抱深識
微言發緒餘河漢浩無極
士氣久不振罷軟無剛風
天意眷吾公公獨奮精忠
雷霆不能

驚正色櫻神龍膏澤不下流
閭閻有憔悴天意佑斯民
公獨蘊慈惠春風小披拂
萬物回生意既賦以全德
必益以壽祺其顏如渥丹
天意可測知再拜上黃堂
一洗屈玉卮戩穀既鼎來
何以致祝辭在外守麟符
十連蒙寵綏在內調金鉉
四海無憂虞邦人丐公留
天子過公歸矐儒願控鶴
雲路從先驅

和王右司回鴈峯韻

宦遊多遠途王事無寧居
人生亦何求意足即有餘
候鴈到衡陽不肯更南去
達人識其幾青雲首回顧
不受寵辱驚進退皆裕如
平生金石心此詩豈欺予
田園歸

去來千載淵明語妙句當竝傳來哲定深許

送王右司移江西憲

日邊好音來綉斧移輅車九重寄視聽四牡煩詢咨才
德難兩全有積時所須平生經綸學豐蓄乃畱施底柱
閱鶴波去就難招麾湘濱督飛輓未曾費符移舉鞭有
流錢民瘠亦自肥攬轡不可留父老結去思星臺照芹
水寒士增光輝心旌逸門闈意往身縶維叱馭豈憚行
願言謹馳驅遙知章貢上喜色生里閭舊聞珥筆風家
有成担書公行將直指淑問如臯蘇衡陽無幽枉雨露
皆霑濡東望尺五天八觀聊遐途善類望主盟至尊渴

謀謨正須畫麒麟未用思尊鱸

次韻胡元龍携詩相訪

自長沙歸
卿所作

杜門度永日蒼苔生柳陰歌枕喚黃妳頽然厭披吟剝
啄來者誰一笑逢知心試歸與婦謀無酒堪共斟解頤
只玄談清風拂衣襟奚囊出妙語曼玉而鐸金為公歌
數詩絃以綠綺琴勸伯舊有盟歲寒猶可尋

題巴陵宰鄧器先北窓

權利炙手熱爭道俱着鞭鷄鳴已盥櫛日莫未息肩中
宵一假寐夢想游鈞天達人袖手觀方寸常超然冰壺
不受暑凜凜含清寒逍遙北窓下俯仰宇宙寬千詩句

有眼一曲琴無絃開尊對白墮拂榻飽黑甜功名不掛
念氣定神自閑淵明亦一出未倦飛已還我常疑若人
本不欲閉關漫仕今墨綬閱世垂蒼顏卷舒各有時隱
顯皆足賢先正文昌丞玉立內近班風流被後昆世以
忠孝傳丹宸新日月黃圖舊山川故家喬木高義盍許
國堅前賢經濟心不在軒冕間才猷時所須何得無裏
言高枕恐未穩鳴珂終小騫煌煌漢元侯事業光青編

陸簿生日

以下分
寧所作

冬令始嚴肅淑氣回晏溫簾幃映瑞色見此天上麟蒙
羽有再來機雲定前身清標入黃綬胸次不受塵洗玉

酌流霞眉間喜津津飛龍御天位喬木思世臣功名固
自有難得惟青春

新晴出谿上因訪王伯明詹望之

萍轉滯巖邑簡出而深居兒輩不自量妄意遊碧池日
占烏鵲喜不寄黃犬書積雨蒸溽暑客思鬱不舒新晴
一散策逍遙滌煩紆意行入幽徑離落相蔽虧竹萌茁
鳳尾瓜蔓纏龍鬚物化日夜流嗟我方棲遲莫受憂患
煎素髮無再緇扣門謁二大清坐俱灰如莊語問善譴
相視一解頤靜窺勢利場疾走爭驅馳自念甘歛退非
黠仍非痴茗乳泛輕雪爐薰駐遊絲且勿談世事揮犀

聊說詩

用元韻答詹望之

隨牒久浮食池擔來卜居鷓鴣一枝足不羨飛天池盟
濯朱墨手拂蠹理故書識字非子雲下惟慚仲舒第喜
宦情薄未解歸思紆對境有暄寂即理無成虧動以靜
為根輪柅常相須捷徑易傾覆夷途固逶迤蒼南有屢
隱白玉不受緇熟視眉睫間容色常穆如伯仲吹簫壩
北堂奉期頤時亦踏街塵意馬不外馳見我床頭易信
我殊不痴喜言雖溢美老眼眩色絲相期到妙處不止
奚囊詩

寓分寧去故鄉久不歸者三年思松楸成長句

暖暖風日暖林薄皆蕃鮮好鳥仍嘯歌晚花亦嫣然問
之此何時春暮將禁烟家中饌觴豆拜掃墟墓間飛鳴
鳥攫肉叢木掛紙錢而我獨不樂慨然生長嘆嘆開編不
能讀當饋不能飡豺獮尚有祭誰忍忘其先念為貧所
驅隨牒二十年少壯不可留覽鏡將華顛空慚北山移
未表南陽阡闔門有百指負郭無一廛坐此客異鄉歸
思空纏綿憶昔初筮仕吾母猶朱顏三釜不及養遽悲
蓼莪篇侵尋歲月久百感難具言傷心思宰木清淚如
流泉孤死必首立古人亦重遷况我雖宦游十世家星

川親朋日在眼可以相周旋
土風有不同客意終未安
花落草淒淒青山啼杜鵑

遊南山寺題澹軒

雲根露竒怪上有青蓮宮
軒窓極青麗疑入懸壺中
凭檻俯寒流披襟納清風
跣趺坐少定滯念冰雪融
人生蟻旋磨世故鳥印空
道眼一回光味與嚼蠟同
此意誰為領白雲橫遠峯

用元韻答麟老

登臨倚木末下瞰魚龍宮
我方解墨綬着身立壑中
翩然一清游飛鳥可御風
前瞻鳳山尾老衲如懶融
見處

詣實際非色仍非空
笑我蠟屐行亦與玩物同
燕坐不出門心遊妙高峯

再用元韻答麟老

七閩名家子祝髮隱梵宮
碧海掉尾鯨不墮世網中
薰爐起香霧撥拂生清風
寂寂枯木岩中有春意融
杖屨厭山水習氣一洗空
違俗非崖畧入俗非雷同
乃知行市廛宛如坐孤峯

和祝聖子送行韻

少年困禳褐妄意取圭組
徒為出岫雲不作潤物雨
三年葭葦叢鳧鴈墮江滸
憂患髮先凋驚呼辭空撫
過期

釋重負揆日趨在所投簪誠未能束擔亦良苦漢庭士
冀北不可一二數顧我最平凡辱君誤推許皇明照百
工天高日亭午海岳雖兼受消埃諒無補汲汲為身謀
人生幾寒暑軒冕既儻來金璧又難貯試看轅下駒何
如黃鵠舉莫待婚嫁了徑為松菊主人隱在城市高人
恋衡宇相期教過從脩綆同汲古

謝黃子山賀得孫

侵尋及頽齡憂患催霜鬢是自如老木枯枿生新枝自
念非逸少屈指無七之日願穀豐下今見鳳有兒安得
壽喬松及渠成立時追念十年事欣戚更乘除瓜葛自

延蔓葭莩相因依賴此一雛生兩家釋猜疑飛鵲逸屋
鳴織翠來華裾相視一粲然英詞出瓊琚醴甘不醉人
湯餅浮銀絲只欠解語花過雲歌此辭知公本惜飲嘗
試覆一卮因之酌梅糖騎鵠何時歸

謝江潭諸公

相逢一解頤款曲吐肺腑主人愛敬客童孺亦呼舞擊
鮮倒家釀花枝照樽俎善謔時絕倒惜飲亦徑醉十年
一會面此身幾寒暑不見即相念臨分無可語翰墨要
陶鍊飲食謹調護行役今何時天家歲將暮故鄉松梓
荒他鄉寓兒女豈不念之深祇覺丹心苦天機馬出塞

人事狙賦芋都門桂玉地久客憚霸旅東風染春紅歸
程涉溪澗經過不厭教弛檐更少任禮簡情乃真惟宜
具鷄黍

題童壽卿博雅堂

會道莫如約要識胸中真講學亦貴博不廢紙上陳王
充與李邕世豈無若人中秘未許見市肆何所聞童君
家多書乃為我輩慮安用蓬萊山萬卷皆聚此又復附
益之秦碑及周鼓剡溪來楮生歛穴會石友持此分雅
俗清渭映濁涇不賄屋自潤無爵身亦榮好事時相過
不憚倒屣迎揮麈言有味寂如無市聲孰如漢中郎孰
似楚左史孰能誦止書孰解作奇字是中猶淵海隨取
而隨有或問賈幾何還可高度否掀髯笑謝客吾非鬻
書叟

題童壽卿秋山圖

我本山中人築室依澗岡世故驅我來緇塵滿衣裳見
此山中景我思更深長老樹何離離瘦石何蒼蒼借問
此何時天寒鴈南翔西風有搖落蘭桂含幽芳

送許士龍秘校

南山霧豹隱北海風鵬飛顯晦不在人屈伸各有時之
子後來秀躡屩飄長裾俗眼變青白論士相目皮父執

謝良齋片言借吹嘘問君方遠遊行李將何如食梅不
免酸彈缺不免悲易盡牀頭金難浣衣上緇白髮倚門
望豈宜去庭幃林鳥能反哺人亦稱其慈勿徒走跋跋
而更歸遲遲志定學始進身矐道方肥譬如汲深井脩
綆思得之持此為親榮玉潤山含輝苦言當贈策申以
南陔詩

題韋同年聚遠閣

以下臨江所作

塵蒙萬家市中有壺公天翬飛倚空翠吞納無中邊江
遠益淵回山遠益清妍雲霞之歛散竹樹之芊綿羽鱗
之翔泳舟車之往還物色四面來輸入簷楹間境遠心

亦遠意將隘人寰我嘗觀洞庭水與天相連流光浮玉
鏡萬象以包涵又嘗登天柱衆丘如髻鬟孤鴻滅沒處
寓目行中原蓬轉墮江城此身縛微官今代韋表微懶
着進取鞭尚記千佛名亦許時扣關自疑脫凡骨揖此
樓居仙江山開畫筭使我思悠然是中有真趣可得不
可傳客至勿揮塵但與浮航船

送施宣教

施參正子也

翩翩貴公子和氣如春溫傾蓋一晤語肯吐胸中真江
頭新雨霽浮鷗波鱗鱗騎鳳吹玉簫歸與覲慈親我老
無所營君方富青春後會未有期人來時嗣音毛穎二

十輩深衷致殷勤助君賦子虛高飛到青雲

壬子春羅長贈別

憶昔始相識公歸自中都時方擢上第綠髮青衫紆論
交兄弟間意氣和笙芋懷文得要攬快語相為娛一別
何間闊流年走陽鳥高情日浩浩風骨乃仙癯顧我蒲
柳姿雪霜疑鬢鬚回思鴻鴈行淚落衣袖濡相逢慰棲
遲此道評精麗稔聞充素蘊諸老推通儒又知治劇縣
民瘼刑繁須清才為世用洗日亨天衢監州尚小試稱
屈非超踰敞門喜重來新詩遺明珠傾倒念有陳草具
陪觴壺自媿學不講義論無根株殷勤謝雅况披索中

腸枯壯志已愴恨俗情厭崎嶇正心所欣日與鐫于
愚柰何復作遠攬袂還躊躇公猶寄異邦同是江南區
但慮懷與安久客非良圖終當念墳墓速歸三迳蕪昨
言亦云然歲寒勿盟渝

題蒼玉軒

羽客家何在翠微有仙躅誰謂降闕遠功行要純熟小
築開壺天燕生媚幽獨室中閱丹經簷外養脩竹竹清
不受塵人清不受俗意甚珍惜之命名以蒼玉此玉可
種不可殮檀栾秀色清於藍琅玕碧樹未足貴直節虛
心同歲寒風前歷歷憂球聲雪裏珊珊鳴珮環他年化

作蒼龍去紫霄直上追鸞駢

清江勸駕送舉人二首

以下臨江所作

歲山有良玉潛淵有明珠寶氣露光彩見者揆肯遺賢
士抱良貴又與珠玉殊方其未達時眇然一布韋時未
取通顯乘軒而執珪鶴書出閭闔嗣聖清明初彈冠今
彙征駸駸上天衢顯親與事君忠孝當無虧

黃堂暫虛位勸駕屬守承金石方過客不敢歌鹿鳴吉
蠲置觴豆少洽賓主情西風吹桂枝馬首將東行春官
奏高第天子開延英親策降清問健論攄丹誠解褐躋
膺仕何止為身榮二劉與三孔至今流芳馨願言踵前

脩勉矣垂令名

次韻分寧羅簿贈行二首

剛腸厭徇俗老眼飽閱世讀書學經綸亦頗識一二妄
意糟粕中啜嚼得馨旨終然不可用落落多左計慨念
古人遠莫救吾道弊修谿有短簿今代習鑿齒貽我瓊
琚章有美而無刺內視才具短不能尺有咫贈言雖甚
寵借譽恐未是公等必飛揚我老惟退避

乙丑太常第君家登兩翁黃鵠久仙去不忘有流風小
最逸群未幾魚化龍江城始邂逅巖邑仍過從謂予
偕二父聯名千佛中一見辭色壯再款肺腑通議論到

易象或借聽於聾我行踏京塵君樓簿書叢情親不厭
久語別殊匆匆回首川陸隔天寒悲塞鴻

郊祀慶成詩

以下中
都所作

燕翼傳丕緒龍飛襲慶基萬年新景命三歲始親祠脩
己崇仁儉承顏洽孝慈和平調玉燭靜謐偃鋒旗九廟
歆禋享三宮集壽祺馨香端可薦降鑒本無私寶律迎
長至觚壇歲上儀貢金來收伯執玉列承疑裸粢清宮
後燔蕭太室時青城出素靄黃道煥晴曦六驥鑾輿穩
千牛彩仗移聲文蒐舊典誓戒儆前期陟配尊皇祖靈
承合大示陶匏浮泛齊繭粟用駢犧皦繹圖鍾奏忱恂

祝冊詞夜分風籟靜天近斗杓垂聖意彌寅畏臣心盡
肅祇欽柴靈下墮拜昨福來綏樂與民同慶寧額已受
釐榮光浮翠輦歡忭擁彤墀日駟屯方罷雲門樂共隨
一聲傳入蹕萬目望華芝丹鳳端門聳金鷄渙號徽寵
恩沾動植協氣暢華夷星拱班徐退天容喜可知乾符
宜永握瑞牒遂傳披嵩嶽聲洋溢鈞鈴色陸離永承長
樂養恭奉未央危錫羨均家國儲祥衍本文函生蒙帝
力擊壤共春熙

和李提幹携詩相訪

古來論人物西蜀名士多李侯有蘊籍自愛如隨和不

肯扣朱門漫刺獨我過筆端金石鳴音節如九歌小拂
榻上塵揮塵傾懸河歲月易腕脫功名忌蹉跎西風向
搖落如此羈旅何倦遊且西還萬里行江沱士誠有所
挾光彩終不磨翰墨更著鞭淵雲可同科

用前韻答李提幹

交遊不厭廣益友未必多晚乃識斯人心肅而氣和薄
言臭味同屢枉高軒過手携綠綺琴絃以白雪歌別易
會合難預愁隔關河老我無所營豈復憂蹉跎才高位
猶下君意將如何有玉不願獻誰能涕滂沱自可薦
藉政雖攻琢磨何以贈君行聖門晞四科

送朱大卿歸龍舒

觚稜掛曉日浮鷁達都城今代朱伯厚勇去投簪纓津
津眉睫間不見別離情問之何能爾內重外物輕聲利
誘一世漏盡猶夜行豈不厭逐逐無由息營營若人着
服高不受世網纓奮身許國久難險亦飽更乘傳上蚕
叢擁旄到龍廷中朝豹尾班詎可欠老成一旦念立園
拂衣即遐征君相雖貪賢欲留終不能班以內閣奧秩
閒館清皖山挿天翠淮水到海平婆娑山水間可築
隱亭鷄豚入新社鷗鷺尋舊盟收身謝危機至此全
修名嗟我為糊口偃蹇侵顏齡仰羨冥鴻高俯慚曉猿

青山不負約行矣謀歸耕

題徐商叟所藏李伯時四天王圖

龍眠有巧手幻出汗血駒老衲或戒之回向心地初遂
畫白衣仙斲與梵釋俱北方四天王亦附瞿曇居雜以
馬龍像宿習終未除四王名字異且覆形狀殊信者謂
其有疑者意其無蕩蕩天門高誰能凌空虛何以信不
疑取諸貝葉書子不語怪神從釋恐叛儒語之且不可
筆之其可乎因畫議及此於公意何如

送陳華文出守當塗同僚餞別分韻得立字

今代陳仲弓入門兩難及長離五色羽覽輝早翔集功

名雖昂來未肯心汲汲自謂牧一州小民亦安輯維時
春將半桃李露華濕慈顏御輕軒綠服隨生立行行即
下車嘯諾解苛急疑香宴賓從仁氣散臯隍政恐席未
暖追鋒已催入塗轍可通行青雲如階級

念往四首

饒州回武
口所作

生別有見日死別無返時綢繆初結髮百歲以為期豈
意中道間棄我忽如遺玉骨空委蛻青山未同歸晤語
永已矣衰懷寧不悲

疇昔鱗溪翁重為子相猶謂我稍可教許以相匹傳此
德未及報黃髮歸山丘子又捨我去垂老增百憂深念

能置法然清涕流

平生共飄泊所至無定居晚有一區宅乃以喪來歸樂
少辛苦多嗚呼止於斯臨沒尚了了做戒皆可書子言
不可忘我意當何如

有姑共體粥有子自抱乳人亦有困窮子獨最艱苦晚
歲未即安此身先逝矣逝者不可作在者誰與處欲以
理奪情悵然還念起

通守趙侯改倅會稽以詩餞行

湖州所作

我來席未溫君去袂難摻所喜相知新所恨相見晚吏
能極頌宥風度乃蕭散同僚有斯人可近不可遠漕渠

新漲生輦路春風滿置之緹屏中驥足終未展夫豈無
秉言相與共推挽語別一盃酒何時對青眼願保千金
軀努力加飡飯

勸農道場山

練日遵詔條行春勸耕事擁旆有傳呼據鞍小馳驚凡
童競聚觀父老謹未詣松徑度坡陀蓮宮得清闕此行
非邀遊所職在撫字示之淺易語諭以叮嚀意扶杖既
言歸解衣聊少憇山中無俗情物外有幽趣僧閑衆所
羨農困吾甚媿不敢飽登臨肩輿下山去

苦脾泄在告因飲白酒一盃小愈魏倅有詩已

而病復作因次其韻見意

羸老畏風濕河魚將柰何
王友豈不佳終難護天和
歎息漫吐納練形空按摩
自笑來日短殘漏鳴銅珂
吏事如衣垢濯之費按掌
養痾諒非宜山林歸興多

生日魏倅惠三首

四海眼獨高江湖走蹒跚
帝念風霜飽命之官仙班刺
天紛群飛政爾袞袞難
鹿挾朱輪去勇哉支狂瀾
作州豈無人孰別涇與渭
仰止雲溪老靜處酌古味
庭戶今無諱晝閑棠蔽芾
吾儂了不知但說物吐氣
門左何烟霧挾持小春還
千鍾酒拍浮一笑衣爛斑
醉

上樓百尺可仰不可攀
定應切星辰天風吹酡顏

送魏倅

俗士不聞道利欲薰其心
陽浮外酌酢中有機阱深
宛陵有君子殊不同令人皎皎
鴉鷺姿入俗不受塵挹之
淡於水即之暖如春筆端奏
金石妙處無新陳念我久
頓挫歲晚乘朱輪烹鮮易以
擾御黠難使馴賴有賢二
車一心同撫循遂於吏事外
拂拭綠綺琴為我肯屬耳
領會山水音恃此定交契
愈久情愈親東風二月初
梅花照溪津語別一盃酒
莫辭十分斟聚散亦常事
豈必含酸辛重念髮種種
不禁憂患侵令君入魏闕
我亦返

山林行藏異途輒何日再盍簪所蘊勿卷懷朝廷須世
臣

舟行過白石見將使夜宿毛家林翌日到莘菴
却回和清老

蒼頭倦晨炊卯飯幾及午泝流赤日中舟子亦良苦魚
躍恣芳飴鷗飛避鳴槽槽仙翁所退藏好境自呈露溪水
清可鑑山雲橫不度坐斷泉石幽不受塵土污問之何
所得妙處難悉數初非練玉泉亦不鳴天鼓人懼道方
肥心遠貌亦古老衲同我來得句時一吐物色盡詩材
筆底隨指呼行行更前之繫纜日未暮轉柁涉奔湍支

路入幽塢倦甚宿茅茨睡熟不知寤遲明又蓐食

露雨點賦晴嵐雲氣布蝗蝻尚飛揚禾稼

護村落有狗偷菘倪且狼顧念此亦悄然回舟雙溪
空羨皎然師詩成有神助

病中即事

塊坐小窻下簷牙烏鵲語飛飛去復來遠屋鳴不已料
汝必不悞顧我亦何喜恐有行人來未知誰是子

丙子重陽日有感

南山木葉赤北山木葉黃秋色日夜變白露將為霜玄
鳥去已久候鴈方南翔携壺登高侶滿手萸菊香佳節

不可負而我病在床人老自多病何為苦悲傷去年重
陽日貴孫在我旁知我愛敬客拱立傳壺觴十五未冠
巾總角頤而長望其有成立門戶生輝光前樓千卷書
可以識義方南畝千斛穀可以充積倉一旦舍我去冰
炭交中腸萬物皆有盡死生理之常脩短百年間何必
論彭殤豈不自開釋念之終難忘長歌意無盡歌罷還
淒涼悲風扣林木為我號清商

初春苦寒摧折到雙溪成長句書懷 癸酉

老去頻多病苦寒摧折之袍繭非不溫不能護清羸滿
園穩附火蓄縮如凍龜西山有桃李借問誰枯枝好花

何時開仲春以為期榮悴自相代出處亦有宜天寒但
深藏日暖當遊嬉強健不須喜老死何必悲曉日升扶
桑暮還入崦嵫置之勿復道理達心何疑及時且行樂
花邊傾一卮

病起

羸軀方伏枕凍骨倍加綿自覺脾為約醫言脉大弦不
禁腰痛楚仍苦膝拘攣搔抑方能定扶持僅可旋緼袍
藏被底熾炭倚爐邊吾衰誠宜爾爾風寔使然迺遭難
有數調護不無愆初日憂難療兼旬幸稍痊是身無寔
相何術保餘年不死方成佛長生乃是仙闔棺寧在起

拔宅謾虛傳力豈能加命人終不勝天災生雖或免等
盡必難延只合情無滯毋為疾所纏窮通皆任運逆順
但隨緣南畝無干斛西山有數椽饑當量腹食困即曲
肱眠此樂人知少浮休永息肩

拒霜飛

池上木芙蓉曉寒摧折之綠葉未盡凋紅芳已先萎空
得拒霜名憔悴不自持人生亦如此榮盛湏及時少壯
不久留老疾仍相隨騰騰當任運慘慘徒自悲萬古同
有盡華巔無再緇及今幸強健不樂將何為

脚婆

竹奴夏日涼脚婆冬夜燠二物不同時皆堪伴幽獨自
吾失伉儷一紀誰與宿年高氣血衰日短天地肅魚眼
夜不暝鷄膚凍生粟伏枕屢展轉扶續但奉曲脚婆當
此時貴重如金玉爨釜蠅眼生汲之滿瞠腹暖氣所薰
蒸羸軀任伸縮粉黛工取憐自可薦衣褥豈不避辟沍寒
而能動情慾不如此匏壺但可暖吾足貌醜不媿媚坐
穩無顛覆妄想何從生黎明睡猶熟

李忠甫見惠長牋以詩謝之

寂寂羅雀門日見交遊疎短李不我棄一年憇琴書青
衿孺子輩共喜得範模黃鶻有遠志樊籠不可拘今將

舍我去雅意何勤渠駢儷出妙語簡潔無費辭捲置懷
袖間報之欠瓊琚惟期在明秋刷羽摩天衢

追念將使叔

青山橫白雲野色極瀟灑見者必屬目寶相存其下此
翁強健時門外無車馬夫豈固絕交欲與無可者獨我
時扣關辭色頗相假玄禪到佛祖妙句近風雅萬事已
陳迹哀思淚盈把即之不復見去之不忍捨優婆塞何
為酌水日奠葦三徑草易荒悲風繞松檜

和汪誠之韻

昏昏未必晦昭昭未必明渾渾未必濁濇濇未必清吾

道本自貴國爵亦可并所以魯素王但欲比老彭嗟予
久歛退用志難崢嶸吾友暫蟠蟄側耳春雷轟韞櫝足
豈則扛鼎肩不頽鼓行當擅塲敵者誰為勅停觀慶多
馬為彼酌兕觥下視俗子陋未識仁者榮譬如黃流汚
寧澆皎月晶相期在遠到所急非小成頗恨會遇踈未
免鄙吝生大篇何春容雅思直和平知君培其根許我
擷其菁虛情能養心篤寔可存誠此理君得之底裏期
再頌

咏便坐梅花

時病起

去年花下立踟躕搔白首今日花邊坐病起更衰朽老

與病交侵歡悰尚何有人老不再少花謝還復開對花
堪酌酒畏病不舉盃寂寞重寂寞春風何事來

病中即事二首

附火膚草燥遠火寒慘慘坐卧置湯婆稍覺兩足暖抓
搔不停手苛痒殊未減飲食固多忌所幸能強飯客至
不出迎予非敢踈懶
決旬不見日凍雲塞天宇兒童相與言雪意恐未已一
月見三白為瑞亦足矣老夫固畏寒貧者憂凍死六出
亂花飛不如晴可喜

雙溪文集卷之二

雙溪文集卷之三

宋軍器大監金紫光祿大夫婺源

縣開國男食邑三百戶王炎 著

明妃曲

掖庭國色世所稀不意君王初未知欲行未行始驚惋
畫史乃以妍為媿約言已定不可悔羶車萬里隨單于
天生胡漢族類異古無漢女為胡姬高皇兵敗白丁下
歸遣帝子稱閼氏欲平兩國恃一女烏乎此意何其踈

至今和親踵故事延壽欺君何罪為此生失意甘遠去
此生戀舊終懷歸胡天慘淡氣候別風沙四面吹穹廬
琵琶曲終望漢月塞鴈年年南面飛

公無渡河

黃河浩浩不可航腰壺欲渡何其狂嫗挽翁衣願無渡
忠愛深言返逢怒河流滔滔翁溺死老嫗搏膺淚如雨
行人勸嫗莫痛傷之極能斷腸古來悞諫多不祥鴟夷
浮江吳國滅老臣疽背霸王歇

雉朝飛

飛飛野雉挾雄雌相與孳尾為之妃人生誰不有配耦

我生垂老為鰥夫永巷蛾眉幾十指一妻一妾庶人禮
壯年受室不及時老去自憐身獨處短布單衣誰為縫
東臯種黍誰共春蒼天高高不可問願照衡茅有孤悶

關山月

山陰瀟瀟木葉黃胡兒馬健弓力強鉄衣萬騎向北去
仰看鴻鴈皆南翔身在邊頭皆萬里嗚咽悲笳壯心死
功成歸取漢爵侯戰敗沒為胡地鬼團團霜月懸中天
閨中少婦心自憐捐軀許國丈夫事莫恨不如霜月圓

白頭吟

青絲織作雙鴛鴦紫綬綉成雙鳳凰在家不敢窺屏著

心願出門逐夫婿琴中解道人心事不辭半夜將身去
君親滌器妾當爐豈料賦成天上知臨邛舊事不記省
千金多買青城眉嫁時衣裳今尚在妾貌未衰君意改
當時去家恨太遲今日思家翻自悔玉環既斷不復連
青銅既破復圓古來佳人多薄命不見鸞膠能續絃但
願新人同燕婉桃花長春月長滿

粧樓怨 并序

曾開府有內嬖二人置之別第曾死夫人逐之局其
門無為王宰曾客也為賦粧樓怨蜀人韓毅伯賡之
毅伯過臨湘話其事因出詩藁矣亦賦一篇

長安甲第凝丹碧門外如雲珠履客主人對客懶將迎
別有洞天雙國色簾幃不動春風香迥翁但醉流霞觴
綠絲垂地細君惜從今可老溫柔鄉歡樂短憂恨長鳳
飛何在遺其凰不言不笑貪恩怨明月無情窺象牀春
暖花枝啼曉露此身今是花無主可憐高塚卧麒麟不
許畫樓藏燕子

舒嘯 吕待制所
居八咏

黃門峙立高崔嵬上有飛仙時往來問之誰作東道主
舒嘯亭中人姓回坐對危峯倒樽酒偃仰胡床篆烟吐
劃然清響透雲端此意悠悠眇千古好是夜深孤月明

風松泉石清更清
我来擬作叔夜輩
一聽空山鸞鳳聲

月臺

餘咏見各卷下

我欲登仙換凡骨
飛上雲頭窺月窟
弄妻問我何自来
咲指廣寒令徑入
歸來却見半隱翁
月臺如在神仙中
霓裳歌舞不用窺
把酒長嘯生清風

太平遇流民

己丑

丁男負荷力已疲
弱妻稚子顏色悲
親戚坟墓誰忍棄
嗟爾豈願為流移
春蚕成繭穀穗輸
入豪家無了遺
豐年凜凜不自保
凶年菜色將何如
但憂銜恨委溝壑
豈暇懷土安室廬
故鄉既已不可居
他鄉為客將誰依
黃

雞啄黍白酒熟去家未久
吾懷歸農桑不事得温飽
見爾令人顏忸怩

雪中懷韓毅伯

雞罷三號來曉色
披衣起見瓦溝白雪
花初墮雲遽回
天意應怜未歸客
男兒缺石為剛腸
忍窮不見可怜色
當知曳履郭先生
可作殮檀蘇屬國

犬捕鼠

點鼠穴居工匿形
宵竊吾餘頻有殺
狸奴已老無足忌
對面侮人渠得志
韓盧千載雲來孫
平時禦盜嚴司存
小施逐免騰山力
不露爪牙潜有獲
主人高枕終夜安

論功法吏能掃姦繩以漢家三尺律鼠罪貫盈猫不職
春日

小凭筇輿行野田麥芒桑蕾春無邊勒回風物未全好
小雨班班天護寒入門烏鵲枝頭語鴻鴈好音慈母喜
車馬不來門巷窮桃花自作深深紅世間萬事易冰冷
春來無處無東風

促織

春山布穀勸耕事秋園絡緯催機杼大家未織吏索租
小家欲織無絲縷無絲可織寒無衣輸租後期罪當笞
悲鳴終夜不能已嗟爾候虫何自苦

大水行

屯雲墨色日將暮晦明揮霍雨如注水殺夜半搖匡床
平旦出門吁可畏盤渦漾瀆吞邊旁悍流洶湧行中央
日中雨復縷縻下溝塍水躍皆渾黃黑風拗怒雷擊地
浪頭起立三丈疆杈杆老木根株拔峻嶒古屋椽角裂
快馬萬蹄迸突而憑凌靈鼉百面瀕洞而岷砰銳兵鏖
戰城柵倒猛虎嗥吼崖谷崩旁觀氣奪目力眩溯流上
下俱不寧升高辟害叫舟楫篙工倚拖不敢行寂寥向
晚頗衰落斷霞返照回新晴鳥飛不盡天界濶蒼烟淡
淡山青青街盃引滿幸無恙收召魂魄猶屏營往年秋

水沈半壁闔門九死得一生今日思之痛方定一見洪
波心震驚吾聞山挾河回衝底柱峽束江盤投艷瀕魚
龍百怪家其中風濤暴橫無終窮小溪常時清且淺漪
連不動平於板淺津可涉深可梁一旦沸騰能奔茫傳
聞潰虹山裂破黑蛟夜出作奇禍抉崖走石勢力粗十
家六七無室廬百年枯塚尚漂泊變生倉卒人為魚君
不見去年四月不雨至七月潤溪一綫皆斷絕川居人
曾死於渴山居人曾死於溺下田黃塵曾蓬勃高田白
沙今障沒嗚呼災害何其頻勸民之命誰肯任勸民之
命誰肯任蒼天蒼天寔照臨

麥苗已有生意掘烏糞者未止

兒童飯犢女採桑水滿東臯耕事忙稻秧半綠麥半黃
天許食新糲粥耆田父略嗟仍笑語赤地一年今得雨
紫蠶有根妻子喜免填丘壑棄閭里

雨晴出田間

去年龜兆生田間今年龍骨掛屋敖烏牛告休卧籬落
夫耕婦饁亦既勞穡稗不生白水滿荷鋤出見禾苗高
屈指何時築場圃割雞炊黍新觴醪人言饑饉有豐稔
一咲破除心鬱陶

臬美

事出漢書內艱
除服八中都作

日轉槐陰宮漏遲蘭湯新浴生涼颺四方清晏上燕衍
千官鳴玉趨丹墀鸞刀象箸薦多品豈無炙鴟兼蒸鳧
射聲彈弋不虛發獨取鳴臬供膳夫卵翼深恩作奇禍
有北大罪宜剪夷臣工拜手謝君賜惟忠與孝終無虞
高皇盛德號寬大惡不可赦彭黥菹惜哉雲夢信先縛
功蓋一世人所疑賜之屬鏤前事失淫刑以逞誰無辜
留侯辟穀以智免鄒侯縲紲幾身危君不見避人不出
畏矰繳商雉深山鸞鳳飛

聞虎傷人

胸臆包藏不可窺誰能攘臂編其鬚未論犬羊俱受禍

飽人之肉人何辜騶虞不肯食生物自古及今常罕出
吁嗟虎豹山林多陷阱方刀如彼何

題周功甫總領石溪三亭

并序

周丈有石溪三亭題咏者衆矣為崇陽薄訟檄到郡
周丈作手簡示南軒三詩令矣留題其意甚厚矣既
投三詩又一歲再見周丈乃云三詩被游成之携去
令矣再錄一本後二十餘年矣假守吳興朝辭入都
周丈子時為寺丞又言及三詩則矣所以見知于周
丈者不過此三詩爾感念知己故詳述於篇首云

溪亭

表章泉石幽嶺畧鷗鷺閑陰陰楊柳邊小築置曲欄平
鋪葦紋綠俯仰眼界寬俗塵不可污漁艇時往還是心
淡如水殺名落人寰自行霄漢上夢逸滄波間我欲從
公遊斫鱸覆酒船三弄噴山竹月高風露寒

雪亭

竹窻環珮殺玲瓏開窻不見山眉青玉妃剪水墮花片
龜手入袖膚粟生紫茵錦幕燎爐熾不知酒面寒欲冰
春蔥百指酌暖玉似勝煮茗松風鳴亭中主人笑無語
雪景佳處未易評詩成呵筆筆隨凍冥搜有味銀海明
天氣浩浩吹鶴鬣欲跨白霓凌太青負暄曝背者誰子

此亭可望不可登

嫣然亭

桃花結子杏花落蛺蝶飛來逸新綠胭脂如醉春意濃
嫣然一笑桃杏俗薔薇之露不浣衣玉頰彷彿生頰姿
無雙國色自愛惜描貌安用詩人詩雨濕東風三月尾
夜寒燒燭照花睡索花勸飲乾百壺美人羞死顰翠眉

黃一翁自郡城回

千金一璧傾秦都此璞未剖衆所疑朱絃度曲有山水
袖手不鼓無人知黃香短褐走江漢失脚未上青雲衢
此客胸中有佳處笑人論士相目皮敝關謁我即辭去

赤霄孔翠不可呼江城邂逅共杯酒塵尾清風生絡繹
步行觸熱兩足繭別後畧無雙鯉魚楚山搖落歲又晚
花信首回南北枝青燭抽穗出金粟喜見間閑行李歸
粲然為我啟貝齒知我不見如調饑揮毫妙入斲輪手
倒囊盡出驪龍珠朱朱白白顏色好春風爛熳催花時
肯留花底共醉倒為君春酒滿眼酤襪襪推之不肯去
忍使故人天一涯摩挲老眼望寥廓願見秋鷄凌風飛

過幕阜山

昔聞幕古洞阜天偶馳瘦馬行山前諸峯却立一峯出蒼
龍墮地走復蟠誰競丹竈汲丹井絕頂萬丈巢飛仙捫

蘿扳磴敢憚險欲往未有一日閑仙翁見我定拍手笑
我黠曲來人間雨淋日炙行路難何如鸞鶴游雲端人
生不比金石堅向來如鷹令蒼顏百年富貴草頭露何
乃自若縻一官雖無道骨可不死亦欲早掛頭上冠南
山之南北山北築室翠微高枕眠

喜雨歌

去年憂旱田原枯龍骨取水禾不蘇張顛待哺神所憫
吏既禱之甘雨隨東阡西陌喜相賀化我硃確成膏腴
炊稗釀黍作秋社翁媪醉飽兒孫嬉今年種藝方入土
梅天宜雨還不雨高仰之田龜兆開污邪亦半無流水

帝從人欲不待祈豐年擊鼓群龍趨山南山北起雲霧
雨脚急來如鞭糜富家安坐有紅粟田家作苦惟饘粥
丁壯力耕兒飯牛早來得雨勝珠玉

留猷之初得孫

藍田美玉驪龍珠天馬之駒丹鳳雛平生眼底未曾見
物以稀有為珍竒世間凡子乏英骨狔犬雖多安用為
留侯豐下宜有後更積陰德栽培之大兒斬然露頭角
胸中篋笥羅詩書文章機杼有家法睥睨雲漢思高飛
小兒學語解揖客眼如點漆膚凝脂家庭有此萬金產
何憂門戶無光輝乃翁昨日坐堂上津津黃氣溢兩眉

女奴走報子舍喜紫蘭玉樹生孫枝不須老釋親抱送
此真天上麒麟兒我來欲與湯餅客對翁壽以金屈卮
看渠一歲能識字八歲落筆驅文辭三衢之留世冠冕
公侯衮衮當無疑他年我未鬢髮白已見此子摩天衢

宿公安二聖寺

蒙城一市萬人聚一堤如缸作遮護風濤悍怒魚龍宮
瀕流壓以青蓮宇潭潭廣殿不動尊夫立二丈夫力士身
楚帆蜀拖日銜尾過者蹶然生畏心粥魚齋鼓二千指
我貧未辦作檀施明朝踏霜出江頭借佛定力扶扁舟

賀吳繼仲母生日

清都仙子玉鍊顏五雲深處乘青鸞桃花欲實王母老
桂花半落姮娥寒芝英瓊藻薄滋味絳霄倒景窺人間
風微水麝香可掬雨定石榴紅欲燃中州風物亦自好
翩然萬里來雲軒潭潭院落春不老別有日月歲壺天
狡狴不動烟縷直吹笙伐鼓開賓筵九重紫誥照環珮
兩兒綠綬扶金船南山可平水可竭高堂歡樂無窮年

題王倅來泉

寒泉一竇行脩渠日夜輸來為納湖荷花菱葉竝籬落
平分十頃青玻璃錫山老湫暗流注此泉疑白玉龍吐
問公泉中何所有明可弄不可取

題巢林

闌闌深居似林谷綠坡手種青青玉市殺不向耳根來
蒙密中間深結屋鷓鴣但願巢一枝鸞亭鷓峙意何如
青雲千級風在下飛翰穩去摩天衢

過浯溪讀中興碑

日光玉潔元子辭銀鈎鐵畫顏公書百金不憚買墨本
摩挲石刻今見之猗那清廟久不作其未變為王黍離
春秋一經事多貶魯頌四篇文無訛漁陽鼙鼓入潼華
公卿徒步從六飛朔方天子扶九廟京師父老迎千麾
紫袍再拜謁道左上皇萬里旋鑿輿牝味鳴晨有悍婦

雙溪文集卷三
二
孽狐嗥夜有老奴扶桑杲杲未翳蝕但歌大業吾何疵
首章義正語未婉前輩不辯來者疑正須細讀史克頌
未用若說涪翁詩許張勁節震金石李郭壯武如虎貌
斷崖蒼石有時泐諸公萬古敬烈垂天憐倦客有所恨
雨濕江寒催解維神州北望三嘆息翰墨是非何議為

吊禰正平 并序

蜀人韓毅伯遊武昌作詩吊禰正平專詆黃祖祖不
足責其言蓋有為而發也昔孟子謂益成括小有才
而未聞大道則足以自殺其軀正平未免坐此就東
京人物論之郭林宗徐孺子黃叔度之樊牆正平未

能窺也乃書數語述此意

曹瞞忍殺王德祖不敢復害禰正平區區黃祖雀鼠輩
乃以嬉笑生吾兵才雖可愛亦可忌人間險過羊腸路
不鋤驕氣禍之媒祖也不仁衡未智黃鶴樓前江水平
鸚鵡洲邊春草青憑君酌酒吊孤塚古來賢哲非貪生
處士一死泰山重文舉一死鴻毛輕

次韻韓毅伯謝人惠茶

一線金沙泉脉來官焙初香春未雷雲龍小瓶到天上
露芽濯濯千巖隈縑緗空滿石渠閣鴻漸經幾方有托
喚作酪奴真薄夫雪乳雲腴何可無哦詩舌本費澆灌

畏遭水厄徒拘拘豈知佩印乘軒客醉飽犧樽羊鼎側
要試江山第一泉紫鳳盤旋蒼壁圖書生品味惟三九
性自嗜茶如嗜酒

次韻韓毅伯趣諸先輩送茶

脫腕符移日旁午魚眼浮香須一煮客來捧腹共軒渠
暫時撥置官文書喜客恨無鮮可擊滿盃脫粟饑時喫
睡魔不待巧擠排雪花小啜清風來人生何苦浪馳逐
但得所求心自足意在春風曉露邊愛惜一旗輕萬錢
碾破雲龍還不飲艷艷金荷扶玉筍渠方醉魄甘沉迷
我自詩情要勾引

再用前韻因簡縣庠諸先輩

書生卯飯動及午薑糝菜絲煩自舉異時甘脆屋渠渠
出自空腸千卷書竹間杵臼相敲擊菜不療饑何苦喫
泉新火活費裁排呼奴更携銅餅來蜀客見之心逐逐
暫借紙窓休繭足歸歛家住淮湖邊草魁可買無青錢
不辦雲腴供粥飲空有束詩如束筍青箬小分鷹爪香
江上擘舟當遠引

次韻韓毅伯誌別

江頭三老風檣急詩叟欲行還却立剛腸不解兒女曹
肯為別離襟袖濕翰墨場中空白眉宦遊不遂休奔馳

平生衲室有秘訣持以贈君君可歸靜而無譁氣方定
清而寡欲心自正耳根毀奪等風波眼界榮枯俱泡影
得此還家雖退藏被褐懷玉中含光踏破青鞋行萬里
猛省昨非今近是但看污瀆有靈龜莫道蹄涔無尺鯉

覓李尉白犬

長安少年好狗馬日日遨遊五陵下八尺騰驤行地龍
突過無前追疾風一箭穿空兩鵬墮尚扶白羽腰駢弓
回鞭更踏南山路射殺南山白額虎却解重環四尺契
快逐豐狐搜狡兔獵罷歸來喚歌舞醜酒割鮮供笑語
窮巷書生那有此毛穎陶泓守環堵老來無力跨寒驢

少日青鞋只徒步何況平生非獵師何須有犬如韓盧
青氈舊物猶在室吹燈未滅憂穿窬似聞黃耳雲來孫
豐顛拳尾雪不如從公覓取扞門戶主人高枕偷兒避

送徐尉移簿巴陵并簡鄧器先汪兼善

兩鳧不到蓬萊峯翩翩墮在葭葦叢口談世事懶揖客
刳回老眼瞻飛鴻子真何事亦來此培塿乃生千丈松
揮毫古錦貯白雪緩頰玉塵生清風相知若恨相見晚
坐席未暖行匆匆離騷滿目江路冷秋氣欲赤江頭楓
少留一日對歡伯蒼顏共變桃皮紅醉中出語最真寔
為君款曲論心胸我嘗縱觀洞庭水水天一色光濛濛

仙人帝子不可見日月出沒滄波中歸來荒縣窳朱墨
自如澤雉拘樊籠君才凜凜萬夫敵天驥一出凡馬空
不應枉笏棲枳棘便合入幕依芙蓉諸公得士喜推轂
從此奏賦明光宮令君錦衣織青鳳先生玉氣貫白虹
相逢問我今何如為言黑頭茁霜蓬青雲事業付公等
歸去願學柴桑翁

用元韻答徐尉

吟詩不聳肩兩峯陸沉鴈驚文書叢銀鈎入眼光照牖
飛來白雪隨雲鴻平生取友半天下短蓬邂逅依長松
尉仙鯨海駕高浪即博鳳律鏘和風詩翁巧手刻青玉

笑人擊鉢徒匆匆懷歸我正念籬菊招魂誰為吟江楓
禹來徐禕筆如掃瞬息竒怪浮青紅傾倒五色崑崙渠
洗滌萬斛塵埃胸翩然舍去友三士碧雲莫合天冥濛
世間英傑不易得一朝聚會江城中才華俱合上金馬
骨相元自居紗籠縣齋冰合只懸榻舉手咄咄時書空
把盃相屬儻相憶更寄出水新芙蓉天球固是清廟器
牛鐸或中黃鍾宮當憐窳步困老冀莫誚豪氣無雄虹
秋月照人光耿耿秋風脫木散蓬蓬流年腕脫不須恨
外物乘除觀塞翁

用元韻寄周推蕭法

雙溪集卷三
十五
隔岸好山羅數峯，逸簷脩竹添新叢。雲溪有此兔一窟，
將雛德曜隨梁鴻。一饑難忍謀食志，鬱不伸成怪松。彼
美溫城二君子，昔未識面先聞風。一如龍媒氣深穩，不
驚徑捷行匆匆。管城之外別用志，懶哦五字吳江楓。動
中養定自有道，鬚豈不白顏甚紅。一如鷓鴣出丹山，律
呂節奏藏于胸。即之肅肅欲益益，意在寥廓觀鴻濛。踞
跚勃窣我何者，亦許附在交遊中。少時浪迹鹿在藪，垂
老能言鸚入籠。心官鄙吝如膩垢，見此水鏡一洗空。霏
霏伏雨濕楊柳，滴滴寒露凋芙蓉。日月逝矣足可惜，夢
魂不入槐安宮。破觥暖浪浸浮蟻，小島生烟明宛虹。為

公更作商聲歌，朔風慘淡吹葭蓬。精金美玉有定價，嘆
息具眼無坡翁。

用元韻答汪廣文

十丈花開玉井峯，藤蘿亦附灌木叢。可憐浮石_食不根着，
南北寄旅如燕鴻。倦飛欲返返未得，夢魂時逸三徑松。
故人相見發孤笑，執熱一濯清穆風。少傾家釀歌驪駒，
有懷未吐行匆匆。山寒不開北枝梅，地遠誰樹南荆楓。
為談此意無為領，撥灰消盡麒麟紅。未免隨俗且折腰，
薄以古今澆其胸。六經之澤溉萬世，譬如畦稻宵露濛。
陳言有味可涵泳，環堵差勝朝市中。退之一賦吾未許，

二禽雅意不願籠乘軒執珪何有哉日光熠熠塵飛空
由來賢達多下位高原不解生芙蓉龍魚仙伯妙此理
垂雲小憇來儒宮洞庭湘山入詩句借與光彩勝赧虹
百聞不及一見面獨對霜月搔飛蓬清光何事亦多闕
試為問之脩月翁

用元韻答鄧宰兼簡華容孟宰

我行六六黃山峯山中瑤草多芳叢浮丘笑我無此骨
倏然飛去如孤鴻隨流逐轉水上萍失地更屈澗底松
絕憐拄笏頻看山未免舉扇一障風長沙三歲坐兀兀
洞庭千里來匆匆擁衾時作故鄉夢寒鴉無數啼丹楓

繭絲未辨竟何補強飯空耗桃花紅巴陵_丘健令工製錦
况有奎壁星羅胸明_月璀璨堆我前老眼照開春霧濛西
寄華容雙鯉魚欲挽淵明來社中頗聞餘事戲毛穎亦
舞玄蛟蒙碧籠心雖入俗不受塵出岫白雲行太空兼
葭四澤風露冷有此美德如芙蓉尋幽或訪墨山寺吊
古可賦章華宮何時再揖兩鳧仙共喚麴生行偃虹無
邊湖水似少海一點君山疑小蓬城南老樹無恙否煩
渠試問呼回翁

用元韻答徐尉

千越亭亭羊角峯下有團團桂樹叢何人為賦反招隱

虞羅亦罟碣石鴻學詩妙處如學仙功成換骨參喬松
肯來洗我箏笛耳檠絲古曲彈南風喜君到此極疊疊
惜我去此尤匆匆百年莫作千歲調試往一省風檜楓
湘山幸有數斗酒江蟹肥大霜橘紅梅仙陶令連兩壁
得酒可流立壑胸漁簑風月笛三弄蚪龍起舞凌空濛
馮夷不得闕北境湖山收拾奚囊中沙寒往事有銅鏃
波穩清時無木籠人生所願行樂爾嗟我愁絕逃虛空
已悲朽質悴蒲柳豈解巧咲開芙蓉青燈照影似書舍
素琴掛壁疑僧宮懸知堂上一杯水難飲天邊千丈虹
大用自當擁金蓮小用亦盍登小蓬騰身雲路五千里

定笑白鳧成老翁

和許尉小洞庭韻

古縣周遭臨水涯中有勝地藏幽竒向來墨綬不領畧
付與漁樵輕棄遺我乘蒼螭上其頂憑高小築誅茅茨
未能隱去學魯山且可幽尋如退之炊烟百堵共一市
民氣稍稍春臺熙至尊豈為繭絲計老令恨無桃李蹊
解衣一洗三年緇微風碾碎青琉璃魚龍悲笑吹白浪
烟藹吐吞蒙翠微湖中一點小君山誰琢瑤琨圓中規
朱絃一曲舞馮夷凌風駕我雙鳧飛遠喚古笙仙鶴來
月寒共醉玉東西天高可逐霞佩去兒女牽衣吾未宜

一官偃倭百僚底蒼龍欲雪將何為徘徊在此為五斗
時亦諷誦淵明詞茲亭信美非我有夢逸故園還欲歸

再用元韻

少年耕釣為生涯早知臭腐空神奇一丘一壑有佳處
人棄我取如拾遺晚將數雞就斗食非願厚祿多如茨
山林習氣今尚在前身疑是王猷之君王垂拱似虞夏
朝野多暇時雍熙公庭日晡鳧鷖散屐齒小穿山徑蹊
隱仙一見即首肯百鍾索酒傾琉璃湖山亦為開畫笥
煙霏空翠俱熹微幼輿風度極灑灑計然策畫徒規規
蒼松奮鬣倚風嘯候鴈張羽粘天飛君山洞庭日在眼

不須引領已丘西急呼泓灑共看語境勝頗與詩相宜
詩成却憶梅子真烏用一官黃綬為江頭誰是吹笛叟
為公度此瓊瑤詞喚起群龍平湖出屬渠扶柁從東歸

喜晴行呈陳宰

以下分
寧所作

秋盡黃雲漲南畝修我園倉築場圃不堪雨脚如懸麻
坐見禾頭欲生耳今君意與神明通爐熏未斷來天風
吹開六出花數點轉盼杲杲扶桑紅日下鳶鳥散亦樂
村北村南爭刈獲白酒香浮老瓦盆樵歌緩扣烏犍角
有客携家來受廛豐登未見如今年老農扶杖笑相語
只恐雙鳧朝日邊

和何應辰過山谷墓韻

何年馬鬣埋玉樹上有喬木清風寒琳琅金薤落四海
萬象頓挫隨毫端追扳前輩豈無意偶來弛擔鳴珂里
生恨與公相後先臨風三嘆不能已論詩誰解鍼膏肓
人間今日無黃香經過一酌尊中碧明月灣頭山間寂

次韻孫居易送行

着鞭欲為功名起椎鈍不堪加礪砥感君雅意重金玉
餞我新詩燦桃李我於吏事非精通向來妄意圖民功
本無仁心致三異豈有遺愛留一同鬢毛班白眼昏黑
身外榮枯從造物耻携奏牘到公車千慮懸知無一得

陳宰生日

花枝點綴深淺紅谿山二月春融融琴堂清曉氣葱鬱
躡鳧此日來仙翁姓名已久書絳闕骨相元自居紗籠
君王厚下為堡障即宿垂光臨一同兩行吏立薄冰上
四野人行明鏡中三年妙巧製錦籍甚治散聞九重桃
李陰邊共歌舞勸君飲盡玻璃鍾着便鞭由此登要路
推轂豈必由諸公未教曳履侍文石亦合戎豸乘花驄
中堂朱紱映綠服瑤池無日無春風摩挲銅狄閱人世
何止他年方兩瞳

題童壽卿遠山平林圖

山色微茫疑有無木葉半脫殊蕭疎雲根更著數椽屋
此屋當有幽人居墨妙通真乃如此畢竟非真惟近似
何如屐齒飽經行是處谿山皆畫筭還君圖書吾且歸
家在江南依翠微

題徐秘校達軒

以下臨
湘所作

洙泗之學心為宗以心會理俱圓融皎如日月猶有蝕
豈可講習無深功仲祥家自有師友箇中嘗指入門否
磨礮浸灌更覃思道不外求皆我有靈臺四闢如八牕
面面高明老通透此道周流無定名此心微妙無定形
知隨物誘心失位思而不達空營營為君再下一轉語

敬以攝心斯為精

冬雪竹 并序

紹熙甲寅歲雖小稔縣官和糶米價遂增兩日雨雪
市中貧民有無炊煙者艱糶反甚於去年之凶歉然
父老輩遂具公牘赴訴於庭因成冬雪行一篇其辭
如古樂府其義則主於諫諫言之可以無罪者也
擁衾展轉夜不眠細數更籌知苦寒角聲未動紙牕白
兒童報我雪滿簷王妃剪水出天巧飛花萬點爭清妍
朱門貴人對之笑初見一白未豐年金甕玉爵扶春筍
飲罷敲冰煮新茗綉幃中有紅麒麟輕暖勝春尚嫌冷

窮巷小家真可憐
典衣糶米無炊煙
江頭津吏日來報
往往上流無米船
縣官要糶十萬斛
天上符移星火連
去年秋旱糶陳腐
今年秋熟米如玉
且願扶桑枝上紅
日轂東來却睠六
今年冬雪民已癯
明年春雪民更饑
九關有路虎豹守
欲語不敢空長吁

次韻答簡簿

少年牛衣嘗熟眠
老眼^來駝褐不護寒
欲呵龜手拈秃筆
怯看冰柱懸踈簷
東風不解着梅柳
翻作六出欺春妍
春回臘盡亦何好
但為浮生添一年
負郭有人如石笋
雪裏哦詩自烹茗
胸中盎盎有天和
戶外蕭蕭尚冰冷

日吹脫粟不自憐
却念野廬無爨烟
此憂未知可解否
準擬為君浮酒船
酒酣傾瀉珠百斛
定覺揮毫轉神速
聞道諸公雙眼青
豈終遺此豐年玉
倦遊別駕老更貧
自謀漸似龜藏六
詩未謂我清而懼
我方忍慾將忍饑
短策歸釣寒江雪
紛紛世事休嗟吁

和王文州梅花韻

何處東風發春早
先傍梅花試天巧
新陽一點破雪霜
春意將回可前料
天公乞我人日晴
新年屈指將浹旬
老懷不似少年好
對花默默仍循循
坐者流年如水急
嘆息浮生駒過隙
與花相見忍相負
洗盃一醉樽中碧

起來索笑巡疎簷愛渠清絕無中邊君侯肯為花吐句
麝煤洒落生雲烟花開花謝莫深問物有榮枯付天命
聞道隴頭天正寒驛使不來無遠信可憐桃李品格低
誰似玉肌蒙縞衣為花着語只如此更請健筆無停飛

題清江常宰道院

古人牧民如赤子令人臨民用笞箠熟知官府本無事
獨恨庸人擾之耳臨邛有客腰銅章三年為吏先慈祥
老農共說長官好桑柘陰中民小康公庭閒暇鴈鷺散
燕坐胡床清晝長撥煩何自文書省治道由來貴清靜
不須柱下五千言沫泗六經無猛政

題徐參議赤壁圖

林赤壁事已陳黃州赤壁天下聞東坡居士妙言語
賦到此翁無古人江流浩浩日東注老石輪囷飽烟雨
雪堂尚在人不來黃鵠而今定何許此賦可歌仍可絃
此畫可與俱留傳沙埋折戟洞庭岸訪古壯懷空黯然

題徐參議所藏唐人浴兒圖

右相嘗慚呼畫師技癢仍復拈毛錐逼真誰作此贗本
亦有妙意生妍姿中庭燕坐必主婦綠雲高髻香羅衣
嫣然媚妾左右侍前浴能言丹鳳雛娉娉及笄二公子
素腕擁項相携扶兩兩為朋四髻亂乳盧隨逐相諧嬉

中者珠二少艾捧顛却立鴉鬟奴屏間擁膝袖玉笋
疑是夢闌擡翠眉側身背面按箏者冰肌綽約不自持
床前跣起各姝麗為兒理髮拭涕洟有犬獺斑受摩撫
與人習熟無猜疑梳粧淡薄服制古如見永徽貞觀時
若非侯家及主第人物無此美且都荆釵布襦小家婦
生子不如山下麩

和潘判官送酒韻

由來高士憐麴蘖為此和氣如三春一朝驟見四從事
使我頌德思伯伶官醅亦自有妙理風味不如家釀醇
掀髯拭玉荷葉消憂破悶還天真此公胸次有醞籍

酒馨且旨如其人平生悞學獨醒客醉鄉有地堪藏身

除日江上逢趙憲

江風獵獵吹客衣水生鱗甲舟行遲今年江上春信早
剝有梅花開北枝問之今日是何日三百六旬當歲除
翩翩鷗鷺定笑我欲得一飽甘奔馳二星移次照鷄尾
綉衣持斧生光輝樅金伐鼓散震動鷓首破浪開黃
三宮萬壽帝出震周家磐石先諸姬分外符節用肺
丞相與國同安危書生白頭不解事佐一小壘將何如
少年側目望雲漢欲與鸞鳳俱翻飛草黃驥病絡頭者
自笑意行身不隨人生虎鼠在用捨未用以此相瑕疵

兒曹婚嫁雖未了此心欲與青山期天無老眼不可
哦詩莫作商散悲

題德夫園亭八詠

聞君家有十畝園竹踰萬箇花亦繁門楣大字扁梅
要與梅花同歲寒問君小隱亦何好脚踏風波身易老
花雖不語解笑人似隱又非何草草破雪暗香先得春
青州從事如春溫女奴洗玉歌一曲對花舉酒成三人
飲酣拔劍氣方怒汴洛神臯難北顧手提萬騎屬秦
未可為梅空隱去

右梅隱

小挿藩籬護洲渚當年手自種嘉樹春風吹出玉瓏璵
水面霏微噴香霧蕭疎木落候鴈翔溇溇白露朝為霜
木奴欲獻主人壽一夜纍纍十顆黃紫蟹螯肥鱸膾好
釀就洞庭春色老蒼頭急走喚客來翠勺金壺同醉倒

右橘渚

次分寧胡宰贈行

別駕無才堪展驥解印來歸私自喜意欲息肩猶未能
政坐文窮巧為祟鳧仙傾蓋如舊知冰玉清言心可洗
况逢父老誇長官撫字有恩淪骨髓做裝暫去桃李陰
遽勤飲餞枉車騎自憐孤冷仍數竒諸公薦口顏難啟

谿上只今梅未花歸去春燕定成壘妙語吹噓恐過情
甚慚綠綺奏山水君才過我蓋十倍乃容塞足陪驪駟
異鄉為客更別離寒日纈黃催短晷平生惜飲亦徑醉
放歌不記南山鯉

次韻吳司令知金州

此下中都所作

曩時異姓新安王中興功烈書旗常胡兵不敢窺蜀塞
至今恃此為金湯我生久恨在王後幸識王孫人物秀
立朝日淺即西還自詭一州宜試守媯墟北望臨咸陽
往事令人多感傷清時乘障姑緩帶試問澆瓜蒞採桑
湖上花光濃似酒紫微惜別同携手一杯為壽謝不能

千里關山漫回首春秋鼎盛握虎符此行善保千金軀
籌邊熟慮得全策歸來却獻平戎書

慶元丁巳九日登叔寶塔同遊者楊大著李校
書馮正字曾著作易校書

湖邊老石立巨鰲背負浮圖千尺高昇高望遠天界濶
海中江樹皆秋毫蓬萊藏室極清靜雖有暇日無遊遨
不應令節亦虛度特為萸菊觴新醪樽前一咲豈易得
身涉百憂今二毛茲遊回首便陳迹事如逝水流滔滔
明年九月定何許未用感慨增煩勞半生隨牒落州縣
暮年結綬來神臯去留聚散偶然耳且覆一盃持蟹螯

用元韻答楊大著李校書

蓬萊雲氣依海鰲中有神仙流品高子雲抄書自點勘
方瞳炯炯分纖毫仲元公退便燕坐日涉藝圃當遊遨
烏衣裔生孫不解此但摘青藜斟宮醪壯年落筆無好語
况復衰颯垂霜毛二豪拔足立塵表下視流俗徒滔滔
詞鋒健鬪取一快往復儉韻不憚勞旁觀微之敵白傅
自分司馬優枚臯倡而不和當受罰丐公酌酒羞二螯

送黃尚書帥蜀

六蜚駐驛臨東吳益州遠在西南隅君王右顧入念慮
選用名德分麟符文章政事俱第一袖手未肯持鈞

清猷之清過於水忠定之信乎豚魚二賢寂寂未有繼
蜀人惟恐公未進沂江萬里飛鷗首祝公善保千金軀
鬢鬢未見一絲白歸來便可居承疑清時緩帶鎮方面
問民疾苦勤寒帷頗聞今蜀與昔異昔日民肥今已臞
願言 意護根本要令可與同安危更須推轂拔人物
勿念折箠笞羗夷想見明年初下車錦官城裏花正都
四郊按堵但耕鑿春風蕩漾隨旄麾遨頭一笑父老賀
九重不用憂坤維

臘中得雪快晴成古風呈堯章詒老

蒼頭熟睡喚不應光射紙窗疑月明更籌可數夜方半

杖上一雞先候鳴
曉起飛花堆戶外
幻出人間無色界
九街車馬不知寒
蹴踏銀盃飛縞帶
杲杲日升東海東
須臾光彩蒸霞紅
不憂桂玉頓增價
人在冲融和氣中
貝闕珠宮五雲際
遙知天上龍顏喜
麥畦白白覆青青
農事來年定豐美

用元韻答李郎中

何人喚得滕六應
遺我通霄銀海明
起來無以助清興
銅瓶煮茗松風鳴
恍疑拔脚塵寰外
玉田萬頃無疆界
蒼宮青亦改容高
下瑤林相映帶
騎鯨人在日華東
曉踏天街無軟紅
雪車冰柱堪着語
何止爭雄郊島中

翩翩鶴氅凌風際
得雨搖毫心自喜
從渠春笋捧金荷
醉倒糴糴貪睡美

喜雨

自饒州
回武口

欲了老妻窀穸事
屈指前期日無幾
羊腸路險不容車
水澀石高灘齒齒
天公憫我憂惱深
一雨聚添三尺水
黃流欲恐舟難行
落盡雪花天字清
六龍扶轂日杲杲
更乞天公旬日晴
襄事歸來閉門坐
但擁竹爐多熾火

用元韻答秀叔二首

人生昏宦只二事
憂喜相纏不知幾
我今豈可老更癡
頰有霜髭口無齒
舉案齊眉安在哉
獨自飯蔬而飲水

半生同住不同行稍解傷悲心亦清雉鳴鳩應春日暖
鳩喚婦歸天雨晴斷除此念如尸坐調護坎離交水火
老身強健幸無事舊日交遊存者幾後來阿秀詩句新
露滴金莖寒著齒笑我胸中千斛塵解纓未濯滄浪水
翠微嘗約載酒行洗耳潺湲泉石清天寒短策未可出
更約東郊春日晴且來伴我牕間坐黃妳在旁同附火

秀叔和章自言及再娶之事因韻戲答之

寤寐閑思疇昔事來往于懷日凡幾伯鸞不可無孟光
豈為青眉并玉齒阿咸今與我不同蛩蛩得草魚得水
流蘇帳暖雙杯行春近梅粧香更清試唱劉郎竹枝曲

道是無情還有情長夜老夫方獨坐手把楞伽對燈火

送石宰

谿頭雪後梅花發飛鳧東去朝雙闕涉溪父老肩相摩
再拜路旁皆惜別問侯何以能得名胸中和氣如陽春
扳轅徒切侯不住金馬石渠湏若人雲溪野叟久閉戶
時枉高軒肯相顧何不臨分把一盃天寒懶出無他故
別離羞作兒女悲此行穩上青雲衢想思要得知健否
寄我平安雙鯉魚

紙被行

瑤姬不觸麒麟紅金盃漱滌琥珀濃狐裘公子喜夜永

桮行暖玉煩春蔥簷頭雪花大如掌洞房但覺春融融
豈知有客方貪睡漏盡更闌不能寐花紅玉白不相隨
賴有楮生為伴侶生家住處近麻姑亦能幻出冰肌膚
絕嫌墨客蠅頭污懶入官黃藏蠹魚寧隨人意任舒捲
雖則軟美非脂韋風姨霜女皆退舍稍覺和氣生攪
梅花破雪催寒去春回人向花前醉女郎霧縠試輕衫
至此失時因坐廢綠槐陰底夏日長人間只要一味涼
青奴元自不嫵媚居然負恃能專房秋風一夜來消息
又却見渠先棄擲冬來復挽楮生歸屬付蒼頭輕拂拭
用則鋪張舍則藏喜愠未嘗形玉色世事乘除無不然

安用動心三嘆息

汪直卿相招子大先生有詩尖後至子大再至

因次其韻

筍輿唧軋度何許水滿東臯新過雨主人倒屣出門迎
喜氣津津貫眉宇別易會難宜少留清談絕倒殊不休
青衿誦詩勸客飲客亦歡然爭旅酬向來青鬢今白首
自古交情難耐久從今乘輿時一來請屬細君多釀酒
穀雨後一日子大再至有詩次其韻

花氣濃如百和香郊行緩臂聊翱翔壺中春色不自老
小白淺紅蒙短牆平時疇翠浪麥秋近老農之意方揚揚

吾儕飽飯幸無事日緇芸簡尋遺芳閨中更覺春晝長
酒酣耳熱如清狂自憐藿食徒過計袖手看人能綴長

鱸溪行 并序

開禧丙寅冬到大坂作此情見乎辭若於傷感而卒
歸於正蓋庶幾變風發乎情止乎禮義云

小谿一曲山四合谿邊楊柳藏門闌當時玉人在花下
對花窈窕矜紅顏一雙白璧不可聘許我結佩乘青鸞
我時年少氣方銳自負落筆翻波瀾謂趁春風上霄漢
可以終老同情歡不知辛苦得一第始見崎嶇行路難
有如萍草無根蒂二紀流落江湖間莫年通籍入金馬

虎豹嗔人窺九關天邊失脚身墮地春風破浪扁舟還
未幾舍我去空委玉骨埋青山重來谿上事皆變

惆悵齊眉難再見王母麻姑安在哉過眼百年皆露電
老身長子恩義深不為向來花映面花枝一謝明年開
玉人一去何時回人今不見花亦盡至此終日空徘徊
百川寧有西流水萬古滔滔同一軌不堪回首細繹思
臨沒之言猶在耳蜀鄉有鳳空求凰秦樹無烏共將子
年來年去春復冬此生有盡情無窮一泓清淚洒不斷
西山蕭颯來悲風惟有老人身更健年過九十如霜松
尊則吾母舅親則吾婦翁收淚相勞問停車少從容悲

思無益不自禁暫時借酒澆心胸明年強健再省親樽
前更酌珍珠紅

挽魏倅項教授小飲

蒲葉青青初出水布穀聲中耕事起去年蝗旱傷農收
今年日望歲豐美聞道郊原麥浪平但慮飛蝗遺孽耳
甚欲往來阡陌間稍與田家共憂喜老大心情畏忌多
攬轡未行還自止假日公庭吏牘稀祇可清談共揮麈
小園春色亦自都醉日杏桃嬌欲語舉杯相屬謝東風
莫待枝頭落紅雨

用前韻酬魏倅

手把一麾來雪水身似痿人方暫起此情本為貧所驅
非戀吳中風土美浩蕩煙波隔白鷗間關道路勞黃耳
幸而別駕有詩流相逢眉睫津津喜我今白首君黑頭
莫訝鍾鳴不知止每因揖客愁下榻豈暇談玄相捉麈
忙裏偷閑花下飲更約廣文同笑語把酒消憂憂更來
見說東臯令渴雨

夜聞雨再用前韻

轆轤百尺汲無水映日四山雲不起朱轡浪說勸農桑
衣食何從可甘美禱而得雨不苦旱竊疑此殆偶然耳
夜半潺潺簷溜鳴孤枕夢魂心失喜兒童挽犢婦餉饁

襟襖耕夫亦勤止鼠跡印我榻上書蛛絲罥我壁間塵
抖擻胸中三斗塵強欲哦吟無好語請公酌酒更揮毫
快寫珠璣歌喜雨

魏倅同杜仲高游黃龍洞次韻

風流別駕臨苕溪行厨攜客尋幽竒五湖浩蕩三江永
綠淨不知凡幾頃憑高縱望心目開便可一傾三百盃
疑與塵寰不同宇彈壓風光湏妙語只恐揮毫驚蟄龍
金相玉質音玲瓏

賀監宅

輕解金龜呼酒壺却問君王求鑑湖歸來踟躕着鶴氅

自辦米帛供妻孥鸞驂一去杳無跡數畝荒園生草棘
惟有青青秦望山曾識湖邊老狂客

春日苦雨

桃花開時苦多雨花似啼粧悄無語桃花謝時雨更多
柰此輕紅委地何明年花似今年好明年人勝今年老
是誰留得長少年對此不須空煩惱雙飛燕子營新巢
舍前舍後穠綠交長鬢但為釀麴米春色尚餘紅藥稍

夜宿閔灘下

歙江兩岸山立壁一水潭潭浮紺碧嵌空老石出中流
觸碎玻璃成沸白灘高水落定難行暮雨淋漓浪新漲生

三更風怒山欲吼催喚金烏回曉晴篙工倚柁咲相語
但上閔灘無所阻明日日晡過歛渚艤船沽酒勞辛苦
清老畫雙溪壁以詩謝之

老文哦詩聳兩肩落筆不停稱腹藁緣詩寫出無殺句
畫史追之誰得到為予壁上留真跡水墨纖穠任揮掃
石根竹樹極蕭森中着羽蟲疑叫噪雖然畫意不畫形
形意兩全方筆老熟視時時自首肯從旁見者皆稱好
師言此亦吾餘事佛祖玄關須探討未宜直說色是空
不着色空斯見道

用元韻答清老

巧匠胸中有全室能文紙上無脫藁老禪善畫亦如是
毛錐未出意先到解衣盤薄小經營驀然揮洒筆如掃
我思詩畫本一律衆作徒多等蟬噪畫手無如王右丞
一似詩中杜陵老正緣此老襟韻高工拙竒常無不好
劉輪妙處不可傳此事難從筆端討由來萬法生一心
貫徹精粗無二道

再答清老

篆車創始自椎輪莞簞從初但蒲藁詩到晚唐非不佳
少似國風能理到嗟予耄矣棄穎泓卧病終年長却掃
客無脫屣一榻懸人不到門群雀噪敢意支郎念岑寂


時將妙語起衰老若人搜句乃餘事雖不雕錐自精好
况於佛祖可呵罵豈無魔宜攻討早辨山居一把茆
為我長歌歌證道

再用前韻

平生言語苦不工甲乙未能成類藁曩時陶謝以詩鳴
竭力追隨終莫到上人詞峯極痛快睥睨千人軍可掃
長鬚驚喜見此客無怪繞枝烏鵲噪師言能詩且工
筆仗先須知嫩老復言能畫亦飽參疊疊玄談聽更好
吾聞法海深又深性珠可得不可討若除詩
未審云何真悟道

與趙道人

欲上青雲却垂翅歸來掃軌空山裏道人說相來敬闕
酒半醺酣談疊疊我今布褐終餘年豈論燕領并鳶肩
謂予形是朱頂鶴两眼藏神高頰顴彭殤壽夭誰無死
不將動目搖湛水道人去後若復來定應難相壺立子



一百廿葉

